



832748

湖海文傳卷五十一

墓表 墓碣

邵念魯先生墓表

朱筠

有明餘姚王文成公講致良知之學卒以功業顯著有效於
 是門弟子滿天下江西泰州龍谿竝述學案傳授著錄者軌
 數百人輻輳馳騁或不軌師說為訛議於世而同里傳其學
 以醇謹稱最者曰徐愛曰仁錢德洪緒山聞人詮邦正胡瀚
 今山後少傳者惟德洪傳沈國模求如國模傳韓孔當遺韓
 邵曾可魯公曾可生貞顯字鶴閒貞顯生廷采字允斯又字
 念魯學者所稱念魯先生也鼎革之初諸老殂喪先生巋然
 承絕業於荒江斥海之濱嘗西北遊走潼關思有所用退而

卷五十一

墓表

老死以古文詞傳於其家死於今六十年姓名不出於鄉黨
 學者罕能道之而遺書將墜筠及門會稽章學誠篤好其文
 數為筠感激言之乾隆辛卯冬先生之親同姓諸孫晉涵來
 謁筠于太平使院為筠言先生始末詳具且曰先生諸孫先
 益先觀最賢思欲張大先生之行與文不幸先後死先益嘗
 改葬先生於縣九壘山墓道之石未有表者敢狀以請筠故
 無所見聞於先生然心知晉涵論君子也不敢辭按狀先
 生幼失母少長察察用父呵自斂從羣兒戲為白打祖母孫
 戒之嚮學九歲讀史卽操槩為徐達常遇春傳有法祖自外
 歸偶舉宋儒語語先生先生興曰其人安往耶願得而事之
 祖以為有志卽為具衣冠送之姚江書院姚江書院者在半
 霖崇正初縣人設以為講學地也亂廢韓孔當率諸人復之

國朝
 清浦
 德甫
 韓孔當

是時沈國模年八十矣尙在歲必一再至爲諸生設講先生立階下聽久之執所業尙書前曰孩提不學不慮堯舜不思不勉同乎國模歎曰孺子知良知矣能敬以恕吾何加焉自是從孔當受業徐景范文亦者韓門高弟子也比見先生歎曰吾弗如邵子先生初讀傳習錄無所得旣而讀劉宗周人譜曰善乎吾知學王氏學者所始事矣年二十爲縣學生獨耻爲應舉之文入則讀古書出則古衣冠行市中未嘗旁視人傳以爲笑久之居祖祖母及父憂戒家人勿召僧七七曰陳梵誦經營窳窳必誠必信一慟盡哀鄉之前輩僉曰邵氏子善喪笑者愧之當是時書院諸先生相次沒諸生散去景范舉鄉試第一計偕京師卒先生獨行抱遺書守其師說而不變然貧無以自存走嘉興依故人課童子給食或有號稱

卷五十一

墓表

二

講學用私憾與王文成爲難者方負重名其徒陳鏜馬彭數造先生相辨難不能屈則歎曰吾哀若所學誠學鄉人之學而已先生應曰若尙不知毀日月者之喪明白哀不暇而暇吾哀耶居數年一與施博論學於放鶴洲先生曰天泉四言陽明原本無極之說儒也龍谿浸淫無生之旨釋也不得以彼病此博肅拜曰博老矣惟吾子崇尙正學自愛河間李球貽書論明儒同異先生答曰致良知者主誠意陽明而後願學哉山其自信如此初吏部侍郎宛平孫承澤大學士孝感熊賜履先後以闢王氏學爲己任朝野之士譁然從之相與牽引詆訶以文成爲異端學者從事四子書又以能毀王氏學爲有功於章句集註庸俗羣師一談不破先生固疾之以爲是不足辨顧在力行耳從同邑黃宗羲問乾鑿度算法會

稽董瑒受陣圖保定王正中學西厯將軍施琅征臺灣過西湖遭先生相與縱談沿海要害琅奇之請與俱北謝不行閒遊鎮江與梁化鳳部將講坐作擊刺之法一月而盡之淮安從防河卒問河淮離合狀北入河南訪黃流故道西走窺潼關喟然曰土則古所耕也而水利亡矣奈何會歲辛巳知黃岡韋鍾藻建姚江書院於縣南博訪有紹文成之學者乃以禮幣致先生先一日戒眾厥明諸子畢至知縣偕教諭訓導至弟子迎於門外揖至階先生出涖階知縣升階揖先生揖教諭訓導次及諸弟子皆揖人釋菜於先賢如禮出卽講堂揖坐先生南向知縣西向教諭訓導東向弟子俟於階童子誦詩闕先生爲講易艮卦知縣願諸弟子曰先生哉先生哉旣罷縣之父老喜曰數十年今見此也丙戌至山東戊子入

京師商邱宋至鄞萬經欲招之與一統志館先生謝曰老矣遂歸康熙五十年辛卯在會稽居外家六月病革作遺訓卒先生生順治五年戊子卒年六十四先生貌豐目有光矜袍布履門庭潔如居室必正坐飲酒數升不亂酒酣以往談忠孝事人人感動平生篤於三黨養老姑終其身從弟廷英數喜言硯蠶之術固乞先生束脯所入行賈輒喪之弗問也友教陶家堰隣婦訕聲數出於柵聞邵先生過數止一年而改數過道墟章氏主人設食主婦聞之切肉必方器必再三拭乃敢進鄉里童子遭於道必拱手立然士之爲俗學者輒貌敬之而迂先生竟莫肯傳其學先生少作觀心錄一卷宗義規之曰無實者弗爲先生輒燬之又撰明史論百篇示景范景范曰未有無紀傳而論贊作者先生欲然謝不敏先生旣

遊倦無所遇私念師友淵源之傳懼及身而卽斬也乃思托著述以自見以爲琦淹功微金許言絕於饒文成立德以揭大任良知曰伊孟出蠶午魚爛執心辨舌作陽明王子傳粵神宗朝異學披猖意心之主惟戢山懋功祇悔而復藥羣髡狂謚寤志厥存沒揆首陽作戢山劉子傳綿綿姚江浙東以醇江西以正良畿躋禱羅楊詭亂望齡汝登逃戒慧定園槩折渠敢告復性作王門弟子傳明道以言不如以身鉉暨彪佳白首歸以全應鰲隱跡宗義纂言死復生不赧何千萬年作劉門弟子傳趙氏忽有民程黃錄之丞相開府生祭者北死哭者西六陵冬青英孫珏來咽咽曲水蘭亭葬於斯作宋遺民所知傳裂儒冠而僧師法別承徐枋顧絳陳恭尹之貞璞完厥有徵作前明遺民所知傳書院飛以革半霖有璧載

卷五十一

墓表

四

剝而復致良知是力誨爾後生無忘前則尙是游是息作姚江書院傳人人自作傳家家異同厥君有錄厥子有牒系厥臣有跡蹤耆舊有聞用紀於故邦作倪文正施忠愍諸傳數十篇先生卒後門弟子合記序雜文編之爲思復堂文集二十卷刻焉又考書院始末作姚江書院志略四卷間從宗義問逸事受海外錄行國錄作東南紀事同邑張五臯從海外芟舍歸先生就與論論合以馮甦見聞隨筆作西南紀事二書未成或云成輒燬矣娶陶氏生子四長承濂國子監生考授州判次承明次繼雲康熙丁酉舉人陝西西鄉縣知縣次承朱孫九人承濂等初葬先生於慈谿之龍山仁和龔翔麟銘其墓後以形家言曰不吉又改葬先生之弟行向榮晉涵祖父也嘗從先生問古文法歎曰紹興自文成講學傳授矩

獲代有四明所在多遺獻若張岱曰章成撰著卓然先生實兼承其業自先生沒而紹興之師法與史學絕矣筠謹案表以表其人之大者今制三品以上用神道碑四品以下用墓表宗義金石要例曰墓表有銘不可謂非也先生厥光不曜而行與文實應銘法筠旣表先生兼取義於昌黎韓子所以銘施士正者而重爲之系曰

君爽之邑系姓惟邵秦漢越宋餘姚支克肖代其有聞傳授異同以節開先生曾祖母翁聖亦有教曰文曰行言修之道守先正正一髮引鈞覘斯郡土脉先生死矣師微業絕卜改葬骨肉其言在家祀先生于鄉鄉先生耶

翰林院待詔小湖高先生墓表

沈大成

翰林院待詔小湖高先生旣葬之十四年叔子中書舍人羽

卷五十一

墓表

五

翼踵門告曰先君之沒也子之師宮允黃公實爲之傳而墓上之石未刻敢以爲請余往居東郊時曾奉教於先生而舍人又同志於古者也爰不辭而爲之書曰自俗學盛行士皆溺於故習而不知反諸古蓋舉世之通病矣有好古讀書之君子出焉或且以爲駭久之而其說大明其人已逝往往有不可及見之恨不朝夕其側而上下其議論也先生幼承太常公之訓長親炙秀水朱檢討而交吳中惠紅豆何義門張匠門諸名士故嗜占最深而痛絕乎流俗自受

仁廟知特奏名出身應奉文字十一年乞假歸優游林泉者又二十九年始捐館舍齒八十有七矣先生旣繩家美又得檢討諸公之揚挖故其爲學一本於經史而尤長攷訂其說古今典禮皆有据依其爲詩專尚唐賢其商榷一集足爲五

言程不止備郡文獻也先生爲人守正而剛其講學獨宗漢儒其持論堅其與人交不阿故其從宦有陰倚之者居鄉亦不滿於庸眾之口也吾郡之文苑開於二陸梁陳則陸佐公顧希馮唐則顧逋翁父子元則陸宅之曹貞素明則管時敏袁景文陸子淵顧士廉其季也幾社陳夏諸公代興號爲極盛 本朝則吳日干王玠右王雲士三君子狎主敦槃而金天石田髯淵盧文子三董二周諸先生後先推激而春藻大雅發聞於時先生出而專以古學教人當其時雖斷斷不能信從旣沒而異論熄大名垂數年以來吾郡之好古者輩出無不躋先生而樂推之所爲聞風而興起也余禱昧近先生之居思欲盡先生之學頻年奔走歸而宰木拱矣然余今日之知從事於古而不迷其所趨者實先生有以啟之先生諱

卷五十一

墓表

六

不鷲字查客晚自號小湖郡之華亭人葬於乾隆某年某月日墓在某縣某鄉之原其事迹具宮允師傳中特表其有關於吾郡之古學者以諗於後云

任幼植墓表

施朝幹

今天子崇尚經術海內士大夫講求註疏之學以余所識若王鳳喈朱竹君錢曉徵諸先生及湯君文起任君幼植靡不勤搜典冊制度名物文字音韻之屬研精覃思馳騁上下烏虜美矣君諱大椿幼植其字自其王父諱陳晉者以通經聞吾郡所謂似武先生者也君紹厥緒益大以博始爲詩賦幽深崛奇旣乃專門考古學者宗之君以二甲一名進士官禮部主事乾隆三十八年四庫全書總裁大臣奏充纂修官禮經同異裒輯爲多是時奉 勅撰書目若干卷條分義舉鈞

剔醇駁簡要該洽君筆者什七僉曰任君當改官翰林矣
竟不果五十四年五月以郎中授陝西道監察御史未蒞任
而病六月卒年五十二君宦京師久惟鍵戶讀書不肯謁權
貴人嘗謂余曰今考据家輒務取名鮮自得亦偽學耳所著
書有經典弁服釋例八卷深衣釋例三卷釋繒一卷吳越備
史注二十卷小學鈞沉二十卷字林考逸八卷詩六卷烏摩
以君之才向使爲文學侍從臣上之可以追蹤周佚魯克勒
成一代不刊之典次亦不讓相如上林楊雄羽獵之作而乃
趨走郎署十有四年甫列臺官忽焉徂沒然吾觀有明若歸
熙甫六十登第猶且浮沉外吏逮以南太僕丞留掌制敕旋
至不起距通籍初僅六年耳或又以無子爲君惜則近世若
顧甯人魏叔子輩老死無後者可勝述邪抑亦從古以來富
貴福澤必萃於夸毗不臧之身邪君旣卒之四月弟大以
喪歸葬某鄉某原余與君生同郡長同學仕同寮爰詮次其
大略而書之曰是爲吾揚州府興化縣監察御史任君幼植
之墓

處士陳先生墓表

錢大昕

嗚呼自科舉之法行士大夫習其業者非孔孟之書不觀非
程朱之說不用國無異學學無他師真所謂一道德以同風
俗者矣然學者自就傳而後粗涉章句卽從事於應舉之文
父師所講授無過庸輒骫骳之詞得其形似便可以致功名
轉不如詩賦策論之難工由是六經諸史束之高閣卽四書
之義亦可勿深求譬猶苾芻誦經禮懺志在乞食而不在修
行蒙竊憂焉攷元時始以四書義取士當時士大夫謂天理

同根人心誦其言者眾則爲其道者將多迄今垂五百年自
通都大邑以至窮鄉蠻徼無不知誦四書尊程朱而未見有
爲其道者所誦者禮義所好者名利豈口耳之果無與於身
心乎何其相戾之甚也於此有人焉能究心於四書以自淑
其身而不爲科舉之學可不謂豪傑之士乎太倉之南鄉有
陳君宏猷者幼而穎敏年二十五始慨然有求道志或勸應
童子試謝不應家貧教授生徒自給手四書一編晨夕研討
雖燕居衣冠必正數十年如一日鄉里笑其迂呼爲小朱文
公君以爲誠然歛然曰吾無其實敢有其名乎甯化雷公鉉
視學江蘇君攜所著四書晰疑往謁雷公延以賓禮留署中
講論無虛日以爲相見晚也君以少時好談易繼乃專力於
四書晚年復作四書就正錄理益淵邃而言極平易間出一

二新意或疑與註異則曰明經當以理爲主與其屈經從注
何如舍註從經耶明季陳孝廉確菴以講學名或言君爲確
菴之後君悚然曰非也然豪傑之士必有待而興乎其立志
如此君諱鉉宏猷其字其卒以乾隆二十八年十月二十九
日春秋七十有三葬於十七都七圖鹽鐵塘今之士大夫諱
言道學懼無實而冒其名或藉以梯進干譽爲世所輕諂然
聖賢之言具在優而柔之厭而厭之終身不怠而未嘗志於
祿利與世競一日之名若陳君者洵加於人一等哉予居嘉
定西鄉之望仙橋去其廬不二十里顧未嘗與君識面君旣
沒門弟子王濤持其遺書請予文表其碣予非能知君者嘉
濤之不忘其師重違濤意而爲之辭蓋師死而不之背亦今
人之所難也

贈儒林郎翰林院檢討彥傑曹公墓碣 錢大昕

吏科掌印給事中汾陽曹君學閔一日過其友同年錢大昕告之曰某之先人行甚高而不求聞於世既歿四十年士大夫數鄉之耆德宜有後者必首屈一指焉夫無善而誣其先非孝也有善而不能彰非義也某生十二年而孤於先人行事知之不詳惟夙所聞於先太宜人及親故常所稱述不誣者粗識一二乞吾子一言以誌墓石給事人品修潔其文質直無虛詞乃詮次而志之曰公諱曰英字彥傑世居汾陽城北十里太平村曾祖朝士嘗遇異人授以術可暴富終不一試客請以千金受其方曰挾術而忘義豈惟害人兼將害己固弗與易箒時告其子曰吾得異術非不可少利汝曹也然遺之以利何如遺之以正乎術竟不傳公未冠失所怙事

卷五十一

墓碣

九

母夫人孝爲邑諸生有聲庠序間與人交有終始重然諾儻好施予宗黨賴以舉火者甚眾邑有王惠庵先生者孝子也貧而樂道獨與公善歲時常餽之粟寒則遺之布人或效公所爲先生輒怒曰若豈彥傑比哉安得以所有溷我張媪者於母夫人爲中表姊妹嫠老無所依公養之終其身張病且死語人曰吾受曹氏恩無以報天道有知其子孫必有顯者矣汾之土斥鹵可鹽塞外鹽亦間有擔以至者例皆禁不得受而令商轉安邑池鹽鬻於市道險又回遠鹽並貴豪商倚勢凌平民輒誣以私販罪公稔其害糾同志詣官白狀請均其稅於糧而逐商事得行民至今以爲便居鄉務爲退讓子偶與村氓詬語卽扶之曰此吾鄰里卽汝諸父行孺子敢無禮耶親詣氓舍謝失教不計其曲直也年五十有一自剋

其亡之日病革家人移牀正寢笑曰尚須數刻及期整衣冠而逝實雍正九年九月三日也配王宜人壽陽縣儒學訓導疑道公之女奉養君姑數十年無間言後公二十歲卒子男四人長學曾次學思次學雍給諫其叔子也登乾隆甲戌進士由翰林累遷今官孫男六人延齡喬齡錫齡鶴齡祝齡保齡曾孫十五人汝廉汝淳汝瀾汝淵汝儉汝淦汝洵汝勤汝涵汝清汝直汝藻汝浩汝淳給事又言公歿後數日見夢於給事張蓋輿馬道從甚盛到家撫子弟如平時類世俗所祀神人嗚呼幽明之理固不可測而行道有福其常也世果有神人其必正直而壹者矣生不求聞死而神之此理之可信者夫給事在翰林日逢 國大慶得贈及父母 勅贈公儒林郎翰林院檢討王宜人 贈安人葬在本村之西原以乾隆十八年歲次癸酉正月二十六日銘曰

卷五十一

墓碣

十

沈房仲墓碣

杭世駿

西河古郡卜子所教凜然節概先民是倣疊曹公行善于鄉貞固隱括以矯俗涼五十未衰乘化則止匪天靳之以昌孫子幽蘭空谷其芳不言過者必式有道之吁

昔眉山蘇氏父子兄弟自相師友史冊書之以爲美談吾鄉沈氏其殆庶幾乎東閩先生爲海昌查少詹聲山愛壻其作合也以詩有子三人次公房仲則沈氏之東坡也浙西自朱檢討竹垞俎謝海內之稱詩者以海昌二查爲巨擘房仲少從初白翁遊繼又采獲於查浦侍讀初白稱其含英咀華宮商協奏不難步武香山凌鑠蘇陸而侍讀亦無異同之論其族叔歸愚亦謂視天地間無結轡不可解之事亦無哽咽不

可道之詞士林以爲篤論房仲流覽旣富遊歷漸廣南踰嶺嶠北抵梁齊過都厯塊以沈雄磊落不可控抑之雋語一洩其胸中之奇凡從學於查門者未有能過之者也初白翁有女孫愛其才遂請爲繼室盧吉士六以序東隅先生之詩以謝師厚妻黃魯直事以目少詹查浦又述其語以目初白余謂授受淵源卽繼以婚姻之好遠自聖門而燉煌繼美韓之李漢朱之黃幹均斯義然則海昌爲沈氏兩世之壻鄉謂吾舅者吾謂之甥爾雅釋親有四而房仲居其二以母黨則彌甥以妻黨則館甥也房仲在兄孟公弟菽林之間無腰鼓之誚菽林觀察登萊提刑齊豫宦轍所至遊屐必借家庭讌語朋友遊處獻酬羣言抒寫獨得皆以詩爲職業若起居服用之不可須臾以離又若飲食男女之不可一日以廢溲心瘁

卷五十一

墓碣

十一

力歲月耗磨欲詩之不工且富其可得乎歸老窮鄉有孟東野之窮無張子野之壽其可哀也亦所以成其爲詩人矣菽林葬君於某山之原謂余曰吾兄孱與子厚志墓之文非子莫屬余曰諾房仲名心仁和諸生家嘉善有孤石山房集系以詩曰

君貌不揚詩最工清氣益益蟠心胸墓門樹價號寒風中瘞瘦骨如青銅其骨或朽詩不朽斯語請質初白翁

孝女吳淑士墓碣

杭世駿

孝女吳瑩字淑君私謚淑士海寧人也父應鳳患滯下伯兄琦文重繭走二百里之石門覓醫醫他出卽迹之武康血流被屨不知也醫齋術不肯行處方與之益增劇琦文哀憤甚引刀割股而刃弗殊一臂幾折執喪廬墓三年母汪以晝哭

故將失明朝夕舐之數月而光復旋患高中死法琦文博求方術以時消息其病之所起主其湯液醪醴者女弟瑩也視無形聽無聲綿冬及夏不夙則莫脇未嘗貼席口未嘗甘味也歷六七年而毋瘳而孝女憊矣形瘠神離不可爲矣年二十有九時康熙歲在甲戌六月八日也琦文獲旌入忠孝節義祠而孝女不得請何也琦文之孝顯孝女之孝隱顯者可辭達可以筆述官司可據以入告隱則深知者能信不知者不信也又非可人人強而與之語又非可人人強而使之證也兩楹之殯閱九年歲在壬午某月日兄子有曦始克葬於硤石祖塋西偏蓮漚之原碣曰孝女吳淑士之墓女徹環瑱願養父母如北宮之女嬰兒子之所爲母哀其志贅同邑朱氏子爲婿女故朱氏婦也宜稱婦說春秋曰婦者從乎

卷五十一

墓碣

三

姑之辭也孝女不及事姑無阼階著代之文無三月廟見之事孝之名懸而無薄不屬於母而誰屬也孝於母在吳則爲孝女穀梁子所謂以我禮之也以我禮之則猶然女而不婦也女而不婦則婦之不可也曾子問女未廟見而死如之何孔子曰不遷于祖不耐于皇姑歸葬於女氏之黨壻無御輪之迎父無反馬之致魂魄魄得依所親聖人之所不禁通儒之所不議孝女之孝雖九原不隔也然則可祭於祠乎古無其禮也古無其禮而吳氏行之所謂禮以義起考有宮而孝女無子奠有牖而孝女無女無子無女而有若敖之餽是吳氏之恕其祠也所以酬其孝也諡曰淑士義何居也詩曰釐爾女士女有士行則與凡爲女者有間孝女讀書明大義從伯兄學潛心經術非聖之書不觀吾志其墓據經以立言孝女

之士行見孝女之與兄同爲純孝者亦見系以詩曰

惟孝有五不及婦人男統乎女聖經不云女嫁曰歸義在食貧有舅有姑至死服勤偶或歸寧不能終身抑搔疴癢勢不得伸北宮嬰兒冠古鮮倫至老不嫁志在養親修川女壘降靈自天依母爲命若將終焉母爲擇對不送之門壻焉出贅女不往嬪母疾危厲食不下咽蛾眉宛宛含愁而顰量水稱藥斟酌等分時其起居時其夕晨時其消息忘寢與飧洗手作羹味適八珍母飲而甘母食而芬回斡造化收召魄魂以女精氣益母元辰綿八寒暑沈疴頓捐醫工咋舌技窮而歎歎女純孝驚猶天神母則痊矣女則瘳矣神離形瘳大命莫延偏親號咷伯兄涕漣兩楹布奠有文一篇誦女力學非聖不觀生孝猶易死孝實艱使堂歛昨褻衣不陳漆鐙無光總帷从懸敢塗不啟凡閱九年兄子猶子葬之新阡蓮漚之兆松柏萬千謚曰淑士告於几筵碣曰孝女表於隧埏敦我一老據經立言春秋書法禮堂舊文虛公酌議誄詞璘闕焯我彤管以俟愍綸

卷五十一 墓碣 七

章烈婦墓碣

邵齊燾

孀人姓章氏諱孔榮陝西秦安人年十五嫁張廷桂爲後妻廷桂者字相如江南常熟人父瀾陝西蒲城縣知縣康熙四十五年卒官初蒲城君與同邑魏士升友善嘗爲廷桂聘其女蒲城君卒數年而士升知秦安縣廷桂往依焉踰年所聘士升女夭又五年士升行取改京秩從至京師士升尋歿遂歸娶同邑錢漢昭女爲妻生一女而妻卒雍正中廷桂避事復之秦安因爲章氏贅壻居八年與孀人情好甚篤頃之孀

人父母相繼卒廷桂事尋解乃與孺人歸常熟廷桂貧旣歸無居舍孺人盡鬻糶具得百餘金僦屋三間居之恨不逮奉養享祀必潔及嫁而妻所生女備有恩紀夫或遠出自以盛年單露常懸劍帳側以擬倉卒生二子俱殤最後生一女名催鳳會廷桂故人今安西道錢銓知撫甯縣請廷桂管記乾隆九年十二月廷桂病歿撫甯明年二月訃至孺人哀慟殯絕柩歸與錢氏合葬縣西門外烏目墩旣窆孺人欲投穴中家人共持止之孺人旣無子獨與幼女單居家益困夫從弟廷梅許俟有子後兄孺人乃鬻其居得錢買田十餘畝自給而依廷梅居焉閉戶織作所處雖淺隘隣婦罕見其面夫先入贖戶部牒授主簿夫歿或購其牒覲以冒銓孺人曰吾以貧故鬻牒欺罔國家罪也况夫名可使有二耶立焚其牒十

卷五十一

墓碣

西

二年五月服除莫畢闔戶自縊家人覺解之防守甚至次日旣夕守者稍倦潛至水側抱夫畫像置岸上自沉死比曉家人始知之見屍面夫畫像端坐不動時按察副使孝感程公光鉅聞之立往牽屬設祭親拜其屍上其狀請旌於朝報可初孺人嫁時不知書廷桂時時教之久遂通解略涉傳記將歿作絕命詩辭數章詞旨哀惻其末一篇云憶往事兮雙淚沾巾想當年兮妾病沉愴感君愛兮信誓殷勤云妾歿兮君必亡身嗟今日兮命不由人君先亡兮妾豈偷存痛萬里兮生會無因輕一命兮地下從君求神明兮引我孤魂寬天涯兮不惜艱辛得伴君兮死亦歡欣十七年兮夫婦恩深食糟糠兮敢怨君貧中路訣兮命蹇時屯喪葬畢兮不死何云傷幼女兮失母誰親死爲君兮此外何論又留書與夫諸從

弟曰初聞訃卽欲死念夫無後無人喪葬今日服除一死更無別事前議俟叔生子爲夫立後勿詐我無後孤魂但家事空空無可如何止有田十四畝可將十畝與所嗣子四畝與鳳女我死棺木不可多費我心不安有許氏屋價十金乞將我埋先夫塋次愚嫂章孔榮手留孺人卒時年三十四催鳳始七歲明年亦夭夫諸從弟日益貧所遺田盡廢竟以子姓凋少未立後廷桂有老僕數嘗營葬孺人不果乾隆三十一年三月二十八日邑諸生栢渭吳慶長等始葬孺人廷桂墓中因共立碣表墓來請余文余與廷桂交舊又多諸君之義曾忝舊史敢闕其辭乃爲銘曰

有婉淑姿生彼陝鄂萬里違鄉自秦來吳甘窮食貧徇夫沉軀薦服齶烏頭表閭厯載二十葬從其夫垂風列女刻銘

卷五十一

墓碣

五

山隅山壤有朽芳名不渝

墓誌

文林郎前右春坊右贊善兼翰林院檢討趙秋谷先生

墓誌銘

汪由敦

先生名執信字伸符號秋谷又號飴山姓趙氏宋靖康間有
 避地居蒙陰者數傳至平由蒙陰徙益都之顏神鎮鎮今爲
 博山縣云平九傳至振業明天啟乙丑進士由邯鄲令擢御
 史國朝兩爲山西江南布政司叅議是爲先生之曾祖拔
 貢生諱雙美郡增生諱作肱先生之祖與父也增生公以先
 生貴封文林郎翰林院編修母孫氏封太孺人先生質
 穎悟絕倫九歲捉筆爲文輒以奇語驚其長老里中爲文社

卷五十二

墓誌

一

先生初不與通輒自攜紙筆入座衆以其幼也易之移晷立
 就數藝乃大驚號爲聖童同里相國孫文定公奇其才命作
 海棠賦曰遠大器也以女孫字之乙卯年十四補博士弟子
 戊午舉於鄉明年中會試第六殿試二甲進士選翰林庶
 吉士散館授編修甲子春命典山西試事丙寅遷右春
 坊右贊善兼翰林院檢討充明史纂修官兼預修大清會
 典方先生館選時召試博學鴻詞之士拔授館職當世
 所稱能詩者麇集輦下新城王尙書人以詩古文雄長壇坫
 聲華傾動朝右一時鴻生俊才多出門下先生掉臂其間自
 樹一旗幟古詩自漢魏六朝以至初唐諸大家各成韻調談
 藝者多忽不講往往聲牙與古人戾新城公自負妙契先生
 著爲聲韻譜以發其秘至所著談龍錄持論顯與新城齟齬

而新城心折先生才首肯之不以為亢也同時如秀水朱檢
討河中吳天章南海陳元孝兩徵士皆折輩行與先生交先
生詩絕去雕飾有初日芙蓉之目天才駿厲卓絕俯視儕輩
少可多否操觚家無足當意者名益高忌者亦益衆朝士某
梓所爲詩徧貽臺館先生甫展卷立返其使一時喧傳爲口
實其人以此銜先生刺骨獨善德水馮大木廷樾所師承者
常熟馮定遠班嘗曰吾生平師友皆在馮氏矣國學生錢唐
洪昇以詩詞遊公卿間所演長生殿傳奇初成置酒大會名
流畢集而時尙在 國恤忌先生者騰章上告徧及同會先
生至考功獨以自任在座者得薄譴而先生以是罷職去同
年萊陽張庶常罷歸以事爲有司所窘避迹依先生張性奇
僻先生命家人事之惟謹及卒殯而歸之鄉里挾舊怨訟其

卷五十二

墓誌

子勢張甚先生力爲援乃解常熟仲生是保依先生十九年
卒於館次爲論定其詩文而擇地葬之先生之篤舊交如此
會典體例多沿明舊理藩院創自 國朝分纂諸公皆遜謝
不敢任先生爲庶常肄國書取檔案傳以文義典制釐然同
局以是服先生才初先生鄉試以第二人受知常熟翁大司
寇司寇故名宿善持擇所取山東鄉墨海內傳誦迨先生甲
子典山西鄉試名墨與是科埒至今選鄉會試藝無不奉爲
科律嗚呼 國家以制藝取士士所爲文關一代氣運卓犖
非常者必不爲空疎卑冗之文而奇詭晦塞亦無由得光明
磊落之士觀先生所爲文與所得士所係於風教豈淺尠哉
先生既坐斥益放情於詩酒所居因園依山構亭榭清泉秀
石喬木美箭各極天趣歸田時年未三十封公太夫人俱無

恙具甘旨承色笑逮事封公者二十餘年性好遊嘗踰嶺南再陟嵩少五過吳閫維揚金陵間栖寓頗久所至冠蓋逢迎乞詩文法書者盈室至流連交讌後進疑先生宿世人而先生與酬接諧狎無少忤徜徉林壑踰五十年名壽並永近代士大夫無與比者生康熙元年十月二十一日卒於乾隆九年十一月二十四日享年八十有三所著餘山堂文集六卷詩集十七卷詩餘一卷雜著若干卷配孫孺人前先生三十七年卒壺德母儀詳先生所爲狀子男六長愚次讜俱縣學附生前卒次慈歲貢生次念郡學生次慶丙辰 恩科舉人揀選知縣次勰孫男九須碩頤頤頤頤頤頤頤頤頤頤皆庠生曾孫男八皆幼故相國陽城田文端公先生甲子所取士是爲由敦甲辰順天鄉試座主而慶舉於鄉由敦實典試事於

卷五十二

墓誌

三

其來請銘也烏可以辭銘曰

名不厭高才不可恃飲酒得過豈惟子美抑有天焉司其行止心無瑕疵何恨于此清貫遐齡一代瞻企復昌其詩足以傳矣吾言勿夸欲垂信史勗哉後嗣尙篤爾祉

太保光祿大夫

保和殿大學士致仕謚文和桐城張

公墓誌銘

汪由敦

乾隆二十年歲次乙亥三月二十日致仕大學士桐城張公以疾考終里第疏聞

皇上欽承

世宗憲皇帝遺詔以公配享

太廟

賜恤典如制予謚文和公子編修若澄赴

闕謝

恩將歸舉葬事以所撰行狀來請銘由敦爲公甲辰主會試

所取士受公知最深誼不敢辭而公歷事

三朝本末具著將載在國史亦非門下士所得私也謹舉

其大者誌之公諱廷玉字衡臣號研齋為太傅文端公英子

先世具詳遂寧相國所撰文端公墓誌文端公配姚夫人舉

男子六公其仲也公少有器識凝重安和濡染家學具經世

實用年二十九成康熙庚辰科進士選庶吉士授檢討入直

內廷受知

聖祖仁皇帝游加遷擢戊子丁文端公憂服闋由洗馬累擢

為刑部侍郎尋轉吏部侍郎當是時公以名相子迴翔卿貳

文學經濟已歸然負台輔望矣壬寅十一月

世宗憲皇帝御極初卽命公協同翰林院掌院學士供

凡筵祭告文字初政殷繁諭旨日數十下公承

卷五十二

墓誌

四

命應奉精敏詳贍悉當

聖意自是嚮用益篤十二月擢禮部尚書雍正元年癸卯正

月奉命為諸皇子師四月加太子太保八月兼管翰

林院掌院學士事充經筵日講官起居注九月轉戶部尚

書甲辰七月署大學士事丙午二月授文淵閣大學士兼

管戶部十月進文華殿大學士戊申三月進保和殿大

學士兼管吏部十月加少保癸丑九月以文端公崇祀京

師賢良祠復卽家賜祭一壇請假歸行祀禮甲寅正月

還朝時公子若靄成進士特授編修而公弟少宗伯

廷璐督江蘇學政皆給假襄門之內朝紳命服輝映閭

里天下榮之前後十餘年賞賚至不可勝紀又賜

第及園墅命紫禁城騎馬皆朝列所希有者乙卯八

月

龍馭上賓 遺命與莊親王果親王大學士鄂公總理事

務且 詔他日以公配享

太廟 本朝未有漢文臣與配享者非常之典公獨當之

命為 皇子師二月 賜爵三等子乾隆元年丙辰正

月奉 命為 皇子師二月

上親謁

景陵公與王大臣留京總理事務自是每 巡幸留公總

理以為常丁巳十一月進爵三等伯己未五月加太保九月

九日公七十生辰

上於木蘭行在 賜詩為壽復遣內臣齎酒筵以賜癸亥

十一月 命乘肩輿入 紫禁城中甲子十月重葺翰林

卷五十二 墓誌 五

院落成 車駕臨幸賦詩宴賚謂公與鄂公曰二卿真不

愧古之房杜戊辰正月公以老力請致政 温旨慰留已

已正月 特命公四五日一入 內廷備 顧問如宋

文彦博故事十一月得 旨予告 御製詩三章命

內廷諸臣和韻以寵其行公至是登 朝垂五十年長詞林

者二十七年主揆席者二十四年凡軍國大政承 旨商

度恪勤匪懈造膝對揚牽移晷漏其所籌畫非可以一事名

非可以形迹數君子觀於雍正以來數十年之間吏治肅清

人民熙皞沐

三聖涵濡之澤而公從容坐論享人世遭逢之極盛養和平

厚福晚節賴

聖主保全以有終始侑饗大烝於戲盛矣則公之慎密周詳

所以仰承

聖明者於此亦略可想見也已公典領機要 朝廷大制作多出公手修

三朝實錄玉牒會典明史諸書皆爲總裁先後典試事自康熙丙戌迄乾隆丁巳與分校者三主順天鄉試者一主會試者三 廷試 朝考皆公首爲閱擇一以公慎將之其佐司寇時山東鹽販糾眾爲不軌青州民倡邪教徒黨甚衆有司捕繫百五十餘人株連未已公奉 命往勘戮七人遣三

十五人而讞定天下服公平允爲吏部絕苞苴杜請託銓政肅然浙江江西界連閩廣流民入深山種麻苧茅以居號棚民千百爲聚不隸州縣爲良民害公請編戶籍行保甲消隱弭患至今帖然又令甲婦人三十歲以內守節至五十歲者

卷五十二

墓誌

六

得旌公建議以未五十而卒者乃享年不永非守志不終請以守節至十五年者一體旌表皆著爲令翰林爲儲才地務培養有所薦舉必深知其人之才品而後上 聞卽擢用終不以語人其諸所陳奏雖家人子弟不得以間請非宣示人終莫得而知也方公之致仕也 召見時奏及配享事

上特賜詩爲券翊日公當入謝適大風畏寒恃 恩眷有素令仲子若澄齋摺奏謝未親詣 宮門 廷議以公大不

敬頌

皇上始終禮遇得以大學士致仕及公薨而仍得與侑享之

典仰見

聖主優老成全 國體有出於臣子所萬不敢冀者公事親孝居文端公姚太夫人喪哀毀盡禮兄弟同官於朝以時讌

集白首相對老而彌篤子姓成黨列仕籍者甚繁無不約之以禮法生平無聲色玩好之嗜退食泊然無所營時手一編晏坐室中寂如無人僚友共事者閱數十輩平心接之多所容納人不見其有疾言遽色桐城東門爲七省孔道大溪當其衝橋數毀公爲建石橋濟渡者里人名之曰良弼橋又設義倉以貸貧乏歲歉則又自出穀助賑以爲常所刻者傳經堂集焚餘集澄懷園詩選載賡集其文集疏稿若干卷藏於家公生康熙壬子九月九日薨於乾隆乙亥三月二十日年八十有四配姚氏 誥封一品夫人子四長若靄雍正癸丑進士歷官內閣學士兼禮部侍郎先公歿若澄乾隆乙丑進士官翰林院編修若淑廕員外郎若淳官刑部主事女三人孫十人曾效曾詒曾諤曾誼曾諶曾諧曾誠曾讓曾訓曾訃

卷五十一

墓誌

七

曾孫一人元弼某年月日

諭葬於龍眠山之瑩銘曰

國家全盛篤生耆耄光岳氣合如星有斗有偉文端遺續燾後繁公濟美爲章爲平氣溫以厚德粹而清爰寄心督爰任股肱歷事

三朝久履揆席長養中和天壽平格出雲作雨不見其迹

聖主主之公密贊之度則謀之協則斷之夙夜匪懈綸綍渙之二十四載元化鴻龐燕國文章風度曲江其可見者爍於

家邦翼

寢廟惟公侑思

皇繹

明綸眷爾舊思考行易名垂宇宙思龍眠賜肝如堂如斧載續世緒克繼厥武勒銘貞珉用諗終古

資政大夫都察院左都御史 贈太子少傅禮部尚書
沈端恪公墓誌銘 彭啟豐

性情正而後學術明學術明而後事業著處為醇儒出為名臣無異道也朱子以來五百餘年聞而知之克符名世之實者在 本朝則睢陽湯文正當湖陸清獻繼此者其吾師端恪公平公諱近思字位山號闡齋世居仁和五杭村家本力農世孝友醇謹鄉黨稱之公生九歲而孤家貧隨仲兄遊學靈隱有借巢老人者資之讀儒書負笈虞山錢圓沙嚴寶成之門既歸家補諸生讀宋儒書刻苦勵志書程子涵養須用敬進學在致知二語於座隅嘗自言其得力曰吾由周程張朱之書上溯孔顏曾孟之心怡然渙然若合符契不自知其手舞足蹈也康熙三十八年舉於鄉明年成進士亟返里門

卷五十二

墓誌

八

理故業選期已過顧以學未成不出也頃之仕為河南臨潁令單車就官謝請託卻餽遺謹號令禁科派四十八年大水請發粟以賑全活無算明年大熟建社倉七所設義冢收埋枯骨捐俸葺穎城築孔家口於鄰州穎民自是鮮水患建岳忠武子忠肅祠修宋統制楊再興墓蒞穎七年膺卓薦以去士民攀車灑泣不得行擢廣西南甯府同知引疾歸教授生徒布衣蔬食泊如也今相國高安朱公撫浙時特疏薦公 聖祖召入京監督本裕倉會臺灣用兵總督滿公請諸 朝

乃 命公往公作遠慮論四篇大指以臺灣宜析為縣每

縣各分都高保甲易於稽察又取民壯拔置行伍以充各標其餘流民必審其籍以授田當時採用之海疆底定雍正元年 召授吏部文選司郎中時銓法久敝胥吏多假手為

姦公夙夜勤慎有姦輒發吏不敢欺旋晉太僕寺卿明年典山東鄉試超授吏部右侍郎每奏對之日齋戒越宿志氣恪恭於育才用人尤兢兢焉雍正五年特擢都御史公自縣令起家洞悉閭疾苦凡事關創革必熟籌其利弊於民生有所裨益而後已當廷議耗羨歸公時力爭以爲不可衆皆驚愕弗爲動

聖主鑒其誠不之罪也雍正五年十二月十三日無疾而終上聞震悼賜帑金遣平郡王散秩大臣奠爵官爲治喪予祭葬如禮諡端恪加贈禮部尙書太子少傅廕一子公立心坦易純於踐履非道義一介不取窮達夷險不以二其心爲文樸實說理類南宋大家所編夙興錄誦法稼書先生出而臨民動以嘉定靈壽之政爲師晚年蒐輯當湖遺書爲

卷五十二

墓誌

九

十四卷其他所著書又數十卷高安相國雅重公哭其喪爲表墓曰理學名臣蓋深知公者也公生康熙十年正月十四日距卒之年年五十有七曾祖諱學顏祖諱時吉父諱大震皆以公貴贈資政大夫妻項氏繼徐氏皆贈夫人又繼宋氏吳氏子三長玉麟監生早卒次遷戶部主事三玉璉廕生女一適舉人趙溶雍正六年葬公於湖州歸安縣埭溪之陽啟豐鄉會試兩出公門下服公之教旣久哲人云亡不勝哀慟謹按公年譜誌之墓而爲銘曰

斯文未墜天挺詰賢斗杓所建四氣回旋有紛其學異說晦蒙闢邪衛正公探厥宗有隳厥守猷猷畏葸謹厥指趨道直砥矢起自循吏擢之卿貳篤業靖共臣道具備爲孔顏樂爲禹稷憂清和與任惟聖兼修

天子曰咨失我良弼制詞褒榮典禮優恤峴山巍巍蒼水洋洋有斐君子沒世不忘

資政大夫禮部左侍郎公墓誌銘

彭啟豐

乾隆三十八年

皇帝下詔求遺書依古暨今耆碩著撰後先並出更

諭

河南撫臣以前禮部侍郎胡煦究心理學所著周易函書獨不在列 命續舉以進於是海內之士咸仰

聖天子褒崇古學發微闡幽光昭文治於無窮也其時胡公子季堂方官江南按察使既刻公遺文行世屬啟豐爲之序復以公前葬時墓志之文闕焉更屬次公行事而爲之銘啟豐故以 廷試辱公知在翰林時又隸公教習飫公之德不忘於心遂不敢以不文辭謹按公諱煦字滄曉號紫弦河南

卷五十二

墓誌

十

光山人其先自江西遷湖廣之麻城後由麻城遷河南之光山五世祖諱靖前明嘉靖乙卯舉人官遼陽通判篤於行誼子敏卽公之高祖也曾祖諱某遵化縣諸生祖諱演亦諸生早卒妣喻氏撫子二一先卒一卽公父諱之杞崇禎十四年遭張獻忠亂喻氏誡其子曰五世宗傳於汝是賴若有變吾義不辱汝善圖之城陷喻氏挈其子偕僕胡家和出走倉卒遇賊相失喻歸依母黨居喻家圍又遇土寇刼掠乃閉樓固守賊焚樓樓中人俱死其事載府志中之杞旣失母爲賊所掠已而逃歸喻家圍遇僕胡始知母邁難狀檢遺骨弗獲哀痛泣血生平敦尚節行多陰德 贈通政大夫母高氏 贈淑人公少而好學能文章康熙二十三年舉於鄉官安陽教諭五十一年成進士時年五十八矣居常究心周易得圖書

一貫之旨臚傳後引 見澹寧居卽自陳所學

聖祖卽以河洛理數公條對甚悉選庶吉士自後屢次

召見問卦爻中疑義 命畫圖以講

聖祖曰真苦心讀書人也旋以檢討直 南書房五十四年

充會試同考官五十六年典湖廣鄉試尋轉司經局洗馬遷

鴻臚寺少卿再遷正卿雍正元年授內閣學士兼禮部侍郎

明年典順天武鄉試五年授兵部侍郎攝戶部侍郎閱會試

迴避卷 殿試讀卷官教習庶吉士明年協理都察院左副

都御史又攝刑部右侍郎七年典順天武鄉試八年充明史

總裁官直 上書房以兵部侍郎 特旨知貢舉是秋又

知武貢舉九年轉禮部左侍郎六月罷職歸公爲人正直忠

厚其所建白必以教化爲先務尤願 朝廷重農桑緩刑罰

卷五十二

墓誌

土

先仁義而後功利其請博舉孝弟也曰十室之邑必有忠信

愛親敬長誰則無情彼生員舉監外其有能竭力奉養無忤

於二親者乎稱爲孝子宜也有能公於財和於室五代不析

居者乎稱爲悌弟宜也臣請每一州縣歲舉孝子一人悌弟

一人 勅下督撫給之匾額免其徭役得見官長如生員禮

其或篤於交友敦慈惠厲廉節下逮僕婢之賤行有可稱亦

令州縣隨時申請量加獎勵如此則化行俗美人知自愛矣

又請責成州縣勸課農桑或別設農官專司勸課之任又言

近見督撫於命盜兩案隱伏難明者止用自行招認四字援

以定罪夫奸黠之徒有抵死而不伏者愚懦之夫有畏刑而

自誣者然則有罪者幸免而無辜者受禍矣臣請命盜兩案

必證據確然後付法司閱實一有不當旋即駁正庶得慎

刑之意時方嚴創參之禁故事每歲秋遣廷臣一人往訊於盛京自春徂冬羈候日久瘐死者衆公至錄囚百五十人其疾病者至五十餘人斃者二人乃請繼曰今創參之案專歸盛京刑部及將軍府尹隨時定案俾情輕者便予未減以廣好生之德得旨允行著爲例其攝戶部時閱漕項行追

案自數百兩至萬餘兩不等公言所追之案遠者五十年近者三十四五年使其人尙存必己家業蕩然或其人旣亡猶復行追必且係累其妻孥使不得爲謀生計徒有行追之虛名究鮮國家之實用臣愚以爲免之便其他請廣言路裕積儲汰浮糧省冗官平權量多切於世務人是以覘公之用也會河南荒公據實以奏時

上已別有所聞

卷五十二

墓誌

三

特遣刑部侍郎王國棟馳往賑濟切責

總督田文鏡文鏡旋奏公嗣子基孟本異姓不當冒官卷中

式公坐是罷歸

上卽位元年公入

觀

上憫公老

詔復原官致仕廕一子入監讀書會疾卒

於京師

賜金五百兩祭葬如禮公所爲周易函書列四

總類曰原圖曰原卦曰原爻曰原占凡五十卷又釋經文四十九卷爲正集外有約圖三卷孔朱辨異三卷易學須知三卷箚錄約旨十卷續約旨二卷卜法詳考四卷爲別集又約注十八卷續集十六卷總一百五十八卷自昔言象數者未有若是其詳也公之善易世固多知之獨其施於家國政事之大者其言或不盡聞於時能傳道之者鮮矣故豐謹備論之使人知公之所以善易者于是乎在故能邀

三朝聖主之知至沒身而不替甯獨以其訓誥章句之業而已公卒以元年九月十三日年八十有二妻陳氏封淑人贈夫人以十四年十二月二十三日合葬於青龍河之原子四長學縣庠生次次學廩生次仲壘舉人俱早沒次季堂生七歲而公卒撫於長嫂甘氏以廕起家順天通判至今官上嘉其才特遷刑部侍郎是能繼公之業以施於天下者公於是可無憾矣銘曰

易有三極經中尊乾元長善爲之門俗儒訓詁滋紛紜太清點綴滓浮雲河洛未啟誰探根時行物生天不言惟公讀書師斲輪得心應手韋編溫立朝侃侃數經綸體仁合禮志所敦地天交泰方氤氳翩翩失實嗟其鄰

王言如日照乾坤潛德有耀貽後昆青山萬古名彌芬有求

遺躅尊斯文

卷五十二

墓誌

三

中大夫直隸長蘆都轉鹽運使蔣公墓誌銘

陳黃中

世宗皇帝御宇十有三年勵精圖治勤求民瘼尤重牧守親民之吏爲官擇人立賢無方至輟文學侍從之臣付以專城之寄者不可一二數諸臣亦並能祇順德意奉宣條教故一時多良二千石治化洽和貪墨屏迹庶幾所謂吏稱其職民安其業者以余所見全州蔣公其尤可稱述者也公諱林字元楚世爲州著姓曾祖彥賓明州學生祖景濬贈中大夫

父時昂

封中大夫曾祖妣唐氏祖妣熊氏

封淑人前妣

趙氏

封淑人母趙氏

封太淑人公少警敏年二十一領

鄉薦舉康熙五十四年進士選庶吉士授翰林院檢討入直

南書房十年不遷泊如也雍正初大將軍羹堯方貴寵呼
喻能爲人禍福其幕府翰林數人皆請於朝以往公門生
汪德容與焉羹堯重公名亦欲請之德容固勸公往公遽請
歸省時人皆指爲迂未幾羹堯敗在幕下者多汗黨籍人始
服公先見頃之還朝調戶部郎怡賢親王方總戶部事一
日檢籍有三稅銀目顧問諸司皆左右視莫能對公進曰在
昔淮南河漕鹽三院解皆故民田後田爲官解而賦未除故
以關稅之不及三釐者半抵田賦半供吏祿有故籍在可覆
視也王顧諸司曰官不當如是耶會有齟齬公者時尚書爲
蔣文肅公每對王論諸司賢否必言郎曹中無如蔣某賢忌
者迄不得行王益器公才遂以道府薦公召見稱旨
命往福建以知府用至卽爲延平守未匝月調邵武精強幹

卷五十二

墓誌

西

敏過於老吏以坐倉糶失察吏議解官有

詔引見

命往浙江仍補前官至則攝守杭州明年移嚴州旣兼攝金
華杭二守事先後歷守三郡劇煩鎮靜因俗爲治事上官不
激不阿臨事有執守在杭日值織造隆昇建議塞海門尖山
別開引河以固海塘公移書極言不可有曰公能使海不潮
則役可興否則勞民傷財萬無成理又上書督撫極爭俱弗
省十二年三月二十五日漏下二鼓牒下索杭夫萬五千人
合旁郡無慮數萬人期三日集海上公力爭曰田桑方棘而
迫期會萬一勿戢將若何必不得已獨不能俟蠶功畢耶昇
怒督愈急且以抗制督公乃以四月送役往又面詰昇以
尖山必不可塞狀昇益忿因留公督役以困之且虞有變卽
誘以罪公冒雨撫循泥深沒脛役人感公誠咸盡力昇又虐

使衆役動以捶撻立威棄鋤而譁者數矣當是時微公事幾殆俄役迄無成昇竟得罪去杭郡大獄屢起公所訊鞫平反爲多有欲以周內爲功者側目視公弗顧也治嚴以清淨爲化訟衰獄空歲饑檄屬邑開廩賑貸不俟報可修舉荒政全活無算婺俗囂悍無賴子縱橫里閭聞公治尙寬恣睢自如公取尤無良者痛治之遂不敢犯

今上卽位以公治最有聞 召赴闕入對卽日除長蘆運使洗手奉公廉隅凜凜商故有公使錢異時院司歲各費數萬緡公以身率儉歲費不及百緡院亦憚公歲取幾減前數之半然用是恚公亦無以中也嘗再護院事得關征羨餘數千吏白故事當歸私橐公命留之庫不私一錢居四年以父母老請歸養

卷五十二

墓誌

五

上覽奏顧謂近臣曰世乃有不願久爲長蘆運使者耶

命籍其名始俞其請明年丁父憂哀毀盡禮葬後日一至墓所至輒哀慟奉母居鄉八載足不跡城市與兄弟友愛尤篤待族黨皆有恩鄉人化其德有爲不善惟恐公知之性儉素旣貴布帷布衾及歸後黃冠草履往來阡陌間出於坦誠人不議其矯也與人交有終始外和內介自號曰介亭此其志也公以乾隆十二年十二月十六日卒年五十四娶周氏封淑人子六良翊乾隆十九年進士知萬全縣良騏乾隆十六年進士翰林院編修良驥乾隆庚午舉人良駟良駟良驕良驥良駟皆後公卒女六諸生謝璠曹若瀾太學生謝之伯趙汝銘曹文唐啟瑜其壻也孫六善長善承善士善交善啟小同孫女五惟公弱冠登 朝回翔中外歷二十餘載甫踰

強仕卽挂冠侍養難進易退卓有古人風烈用世之才又未
獲盡展故其吏跡見於治郡爲多余嘗踰仙霞嶺入閩坐篋
輿中知輿人嚴產也因詢以前後州守孰賢愀然曰惟十年
前將使君愛民如子百姓無福好官豈可常得耶余爲嗟歎
久之初余以乾隆三年客京師公屬掾吏聘余入使署課其
三子故良翊良駟良驥皆從余游其明年秋余辭歸省侍後
三四年間往來南北兩見公於天津酒酣耳熟公輒抵掌縱
譚天下事兼論人才邪正及生平進退大概其英風偉抱抑
塞磊落至今猶想見其爲人而公不可作矣公卒後十二年
良駟亦侍母里居走書踰三千里奉狀來請銘且曰非先生
無可銘吾先大夫者然則余又何忍辭銘曰

大鵬絕雲斥鷃笑之驚馬戀棧驂駟載馳猗與蔣公玉堂早

卷五十二

墓誌

七

登冷官寂寞水山肯憑振職郎潛屢騰剡章出綰郡符政繼
冀黃治劇撥煩見善者機衆人之母可慰渴飢繼處脂膏若
將挽公歸拜高堂其樂融融入謂公才勇退曷爲詎知公心
好爵莫縻粵嶺之高湘源之清起懦激頑公實豪英紗帽山
陽公豈是藏毅魄睽睽浙水桐鄉我最其迹幸無媿辭萬世
有考其在子斯

光祿大夫吏部尙書協辦大學士諡文恪劉公墓誌銘

陳兆崙

公姓劉氏諱于義字某號某江南常州武進縣人由翰林起
家躋通顯出入中外荷

三朝眷遇累官吏部尙書協辦大學士 誥封光祿大夫加
太子少保年七十有四卒於位

天子覽遺疏震悼 賜諡文恪以葬初公在翰林文譽甚著康熙晚年

聖學益懋翰林官凡有擬撰慮不稱 旨輒推公公為之

輒報可以故掌院學士倚公若左右手

聖祖知之而以官資淺未大用同官亦但以公職于文而莫之奇也

憲皇帝登極元年以原銜充 日講起居注官尋擢侍講視

學山西還 朝遷侍講學士順天府尹五年遷詹事又遷總

督倉場戶部右侍郎自是屢歷外任七年奉使甘肅明年遷

吏部左侍郎賑山東饑奏發倉粟百餘萬石白金十萬旋

命協辦巡撫事其冬以侍郎督直隸河道又明年晉刑部尚

書攝直隸總督事乞貸飢民坐盜論死者百餘人並奏除直

卷五十二

墓誌

七

隸為盜不分首從皆斬之令旋改署陝西總督自為坊官至

列卿開府纔八年耳所至能宣

上德意以仁恕為心而性沉密習勞苦能辦大事當是時

先帝以承

聖祖休養之後吏民恃寬大為奸欺懼遂積玩不振銳意釐

剔以嚴明持之而淺見寡識之徒動欲以谿刻中

上意顧輒得譴責獨公孤立排羣議所陳請無不允者蓋惟

先帝之聖有以成公之賢而公之卓然有立使天下不敢薄

文事為無用致少損

先帝知人之明則洵足光耀 朝廷且為詞臣增氣色者也

方公之奉使西行也甘肅自康熙末至雍正四年凡虧帑金

一百六十餘萬文書散缺莫知所由公為設法清理一一歸

欵無誤及後任總督部署西師往返凡四年一切屯田築堡安集流移輸送軍糧戰馬心力俱殫故公之在西勞最多而亦以所領過繁不任吹索乾隆三年挂吏議罷官尋起直隸布政使司遷福建山西巡撫八年十一月召爲戶部尙書明年晉今官又明年加太子少保

上素心識公旣廢復起官階益進公之不敢引老病乞骸亦以此曾祖祖父並以公貴累贈如其官配某氏贈一品夫人前卒自有銘子男二長曰復雍正甲辰進士翰林院編修改浙江糧儲道前卒次曰益乾隆辛酉副榜刑部雲南司員外郎孫三人曾孫五人銘曰

天生良輔幼而失怙母莊教之爲世霖雨稽古之榮榮開大府秉鉞凡五就中西征殫智竭能鬚眉皓白士馬飽騰太歲在卯天驕伏卓息甲興農迺歸元老詔同三司治畿輔水穿渠樹坊厥功懋矣如何柱石遽爾傾倚一人軫悼萬眾漣漪

卷五十一

墓誌

大

墓誌

李逸民墓誌銘

沈德潛

康熙丁巳歲李逸民筠叟先生卒年八十越十三年庚午葬先生於梅灣山萬池字圩志石未立迄今五十一年先生孫恕懼高行之湮也屬草志銘鐫諸石先生名魁春字元英晚號筠叟系章渠李氏爲前明諸生與潛忠先生許玉重致以甥舅爲莫逆交當是時流寇披猖中原板蕩江左諸紳士立門戶縱情文酒先生與潛忠論古今節義事皆裂髮豎恨不能以諸生効死疆場間會甲申變思陵殉社稷問至北向號哭家人知有死志日夕環守不得死後聞潛忠死曰玉重死

卷五十三

墓誌

我何顏獨生玉重死而我生我無以安玉重魄我益滋戾收其骨葬白公堤南撫恤其家福王南渡後倡同學皇請當路贈翰林典籍私諡潛忠不負同志也先生死志未遂故身雖存心等於死方袍角巾屏跡郊埜時直指李公某按吳重先生名屏車騎微服過訪既相見道姓名知前進士赫然爲達官者也直指示勸駕意先生曰聞之堯稱則天不屈潁陽之高武稱盡美能全孤竹之潔楊子雲曰鴻飛冥冥戈人何篡今鴻已冥矣戈人猶不忘篡耶願公全薛方蓬萌之節拜賜實多否則死耳且君子愛人以德旣已自誤又復誤人知公必不爲也直指慙謝去繼以高隱鴻儒顏額相贈先生笑而裂之遂甯李如石先生實令長洲棄官後僑居吳門往來無間嘗致書先生予性峭潔君亦不耐氛垢廿年來晦明風雨

悲歌憤叱無日不共之予固覺臭味之合君不免上炭之嗜矣云云時先大父亦棄諸生奉劉剩庵學博避地陽城湖濱歸故里每之李長洲寓及先生家先生以兄禮事先大父三人會合或終日獨坐恍慨歌泣外人莫能測也先生愛佳山水一瓢一杖逍遙林壑間喜種竹方曲屏障悉畫竹名其齋曰竹隱別有寄託非山濤王戎意也既老杜門日誦楞嚴豈一生心跡不能自吐託之空門以消其抑鬱耶生平纂述甚富經史子籍及陰陽醫卜之書多鈎纂注釋鼎革後委諸燼今存春秋三傳訂疑痘科合璧皆屬晚年刪定者配沈氏官浦望族子二長淇次汝霖吳庠生孫四人某某恕曾孫幾人某某繩長洲廩生子家與李本世戚而曾孫繩又嘗受業於余則銘先生者宜余抑微顯聞幽吾生素心也銘曰

卷五十三

墓誌

二

龍潛鳳遶遶陽九疵物激清心不朽抱節後死對死友幽堂杳杳閉已久銘辭勒石四紀後千秋論定在人口嗚呼有吳逸民李筠叟

胡東樵先生墓誌銘

杭世駿

乾隆二十有四年清溪胡翰林彥穎將於十有一月癸丑葬其王父東樵先生於經南圩之阡至是距先生之歿蓋四十年有二年矣有唐杜甫旅卒岳陽子宗武病不克葬而以屬其子嗣業歷四十餘年而乃克竟先人之志遷柩偃師彥穎焦勞晝夜過時而卒安先生于幽故有合于元氏之所歎於嗣業者亮其遇而不責其慢君子有恕辭焉按狀先生名渭初名渭生字拙明東樵其晚年自號也胡氏籍隸餘姚先世諱子中者始遷德清曾祖父信隆慶戊辰進士廣東順德令有

名於時事載明史祖子益諸生考公角天啟甲子舉人先生十二年而孤母沈孺人挈先生避寇山谷間歸則牖戶漂搖草竊猶充斥有田數十頃在遠鄉租船至中途輒被劫掠乃鬻負郭之田以完賦家遂赤貧年十五爲附學生試高等爲增廣生高文遠俗連不得志於有司乃入太學館益都相國所 聖祖側席方聞有道之士復唐宋博學鴻詞之科相國欲以先生應 詔堅辭不肯就羣公避嫌以相國子師莫

敢先發及見薦牘無先生名則又大驚先生自是遂絕意科舉之學專窮經義崑山徐司寇乾學總裁一統志假歸許以書局自隨禮延太原閻若璩無錫顧祖禹常熟黃儀洎先生與修開館莫釐峯下因得縱觀天下郡國之書凡與禹貢山川疆域相涉者隨手鈔集與經文比次以酈道元水經注疏

卷五十三

墓誌

三

其下酈注所闕凡古今載籍之言苟有當于禹貢必備錄之依經立解章別句從歷三暮後成名曰錐指其於導河一章辨析尤至謂後世河日徙而南則兗之西北界不可得詳河南之濟亡則兗之東南界亦苦難辨華陽專主商洛則梁之西北界茫無畔岸黑水與雍波通則梁之西南界何所止極研精覃思博稽圖籍手摹圖四十七篇凡九州之形勢及古今郡國地名之所在八方相距之遠近大略粗具海甯查學士昇以先生書上進

法駕南巡先生撰平成頌一篇并前書詣獻

行在

上深嘉歎宣至 南書房直廬

賜饌

賜御書詩扇

賜耆年篤學四大字稽古之榮近代儒者或未逮也錐指既成他經以漸次及謂詩書禮春秋皆不可以無圖唯易則無

所用圖六十四卦二體六爻之書卽其圖矣其卦之次序方
位則乾坤三索出震齊巽二章盡之矣圖可也安得有先天
後天之別河圖之象自古無傳從何擬議洛書之文見于洪
範五行九宮初不爲易而設作易圖明辨謂漢儒專主災異
以瞽史矯誣之說亂彝倫攸敘之經害一洛書之本文具在
洪範宋儒乃創爲黑白之點方員之體九十之位且謂範之
理可通於易劉牧以九位爲河圖十位爲洛書蔡元定兩易
其名害二洪範元無錯簡宋儒任意改竄移庶徵王省惟歲
以下爲五紀之傳移皇極斂時五福至其作汝用咎及三德
惟辟作福以下並爲五福六極之傳害三辨誤析疑作洪範
正論大學一書朱子作章句後諸儒皆以補傳爲疑先生以
經文此謂知本二句當在止於信之下知本蓋知止之論格

卷五十三

墓誌

四

物致知與至善釋在邦畿章內元無闕文無待於補作大學
翼真太歲在甲午正月九日考終牖下春秋八十有二配黃
氏諸生幼良女子四人方騰出繼大宗山西大同令 贈先
生如其官調陵川方質方威諸生方詮 女二人適游擊
沈運桂諸生沈益新孫十人彥穎翰林院編修勲山東臨淄
令彥輔貴州清平令彥昇由額外主事改授山東定陶令彥
平彥冲早卒彥諱彥博彥韜彥肅皆諸生曾孫十餘人元孫
二人銘曰

學猶苑也經爲之根非別黑白孰定一尊苟學不醇經義終
晦羣言紛囋不鄙則倍清溪縈紆四水交趨織簾而後篤生
真儒於惟尙書有體有要陳疇制貢厥義孔奧竹素散逸夏
傳不傳搜析精微能執聖權抉摘河洛綜貫大學游情三古

覺彼後覺者年篤學聲徹

九重

天章魏煥由稽古隆其人雖亡其精則存墓槨後凋漆燈不昏剖碑埋幽以表經術謨德考行視此信筆

黃再岑墓誌銘

杭世駿

君姓黃氏名元嘉字柔則再岑其號也系於江夏勝國時有名勝者以杉關戰功得世襲杭州右衛千戶遂爲錢唐人四傳而爲斌以正統十四年討處州賊葉宗留殉難得世襲指揮又七傳有名登瀛者君大父也名汝祥者君父也君少食貧不事苟得居喪擗號喉瘳而色墨行營馬鬣露宿星飯龜手以襄舂搗血滲著土上裂麻裹創觀者蜚鼻伯兄聖修蚤世無後牽長子璋純素而奉魚菽沃酒以告靈牀曰嗚呼伯氏以是續汝爲不死矣其孝友大節如此體瘠善病寡言笑

卷五十三

墓誌

五

閉關績學讀班范以上書數萬言與鄉之詞人洪昇沈名藻輩爲吟交著有再岑老人集藏於家年五十有二以康熙某年月日考終牖下先娶明孝廉越郡陶公長女生一子卽璋繼娶同邑包公次女生三子一女子曰璉曰琛曰瑚琛工詩善繪事奉母能色養今將以雍正某年月日葬君某阡來乞銘銘曰

君身後有令子葬君骸鬻十指陰丸丸植楸檟攀枝條淚沾灑繪遺象丐銘詩貞樂石無媿辭

王耕煙墓志銘

沈德潛

從來藝事之極者必歸大家論詩推少陵論書推平原而論畫於宋推北苑於元明推子久石田此三人者畫中之少陵平原也當今之能繼北苑子久石田而興起者則有耕煙王

先生先生童時無嗜好常引菝畫壁作山水卽生動時東
二王先生以畫擅當代名二王者奉常公煙客廉州公元照
也廉州過虞山偶於壁間見小幅驚喜甚詢之知王氏子物
色之甫弱冠也歸語奉常奉常具舟迎館於西田盡出唐以
後名畫俾坐臥泳游其中而四方收藏家輒往還蒐討心遊
目想盡得古人秘奧而一以靈心運之垂二十年遂成大家
先是館西田時做古人神廉州忘分推服曰此非吾弟子三
百年罕覩此人矣而前後稱揚如梅村櫟園阮亭漫堂諸前
哲或見之記載或形之詠歌推爲大家無異繡繇是 內廷
知其名徵召之以山林士待 詔輦下方其繪 南巡圖

也天下能手駢集咸遂巡莫敢下筆先生至口講指畫凡山
川形勢 六飛七萃諸大小臣工與夫老幼男婦之駟頤

卷五十三

墓誌

六

望幸者咫尺千里如印泥聚米然衆遵守分繪而先生總其
大成圖成

上覽之稱善欲授以官先生以不能任職辭出都曰公卿祖
餞賦詩贈行傳爲盛事以是知先生所重不在人爵而杜老
所云丹青不知老將至富貴於我如浮雲者乃於先生信之
也先生篤孝友慎交與不翁翁熱尤重感知奉常廉州沒歲
省其墓至老不忘乞畫者無虛日必慎擇其人否則巧取豪
奪不可得晚歲煙雲俱養外吟風弄月自足性天以是終其
身殆隱於畫而畫外別有事在者耶先生姓王氏名翬字石
谷耕烟其號宋忠臣堅之後世爲常熟人祖載仕邑諸生考
參龍湛隱嗜古亦以畫聞猶石田之先有貞吉也先生生於
前明崇正壬申二月二十一日卒於康熙丁酉十月十三日

年八十六配錢氏有淑德子二有譽邑諸生疇太學生孫五人某某曾孫八人某某乾隆癸酉得吉壤冬某月日葬先生於虞山北麓曾孫玖大椿來請志墓玖亦善畫與予善大椿邑諸生嘗問業於予者也其烏容辭予聞 國初畫有三王之稱謂奉常廉州與先生也後有二王之稱謂先生與麓臺侍郎也分位懸殊聲望則一又聞暉南田壽平寫山水兼神品逸品見先生畫曰我讓子爲第一人遂專工花卉稱絕藝於此見南田之虛衷而先生之致其退讓者實有無忝大家之目而畫外之品尤有足重也夫銘曰

烏目秀起蔚生名人造化在手寢食煙雲辭榮還山蒼年頤神昔親杖履歲惟丙申別餘一載辭塵歸真於今三紀交其曾孫逢君歸藏來徵銘文無愧詞勒諸貞珉後之過虞山者謂此耕煙幽竈而鄰子游氏之墳也耶

黃尊古墓志銘

沈德潛

當代以畫名者五人武進得暉壽平格太倉得吳獻山歷王麓臺原祁常熟得王石谷翬最後得吾友黃尊古鼎五人中麓臺第進士官侍郎顯名最易四人逸老布衣而名與之齊覺四人較難然壽平獻山石谷得吳祭酒梅村王司寇阮亭諸公前後道揚宜其名流播遠邇而尊古當諸公徂謝推挽無人竟以筆墨見重人世尤爲難中之難也生平好遊覽嘗之齊魯登岱歷燕韓趙魏入秦登太行終南太華諸山又出塞垣數千里經于闐近身壽國至蹤跡俱斷乃還後巢黃山上匡廬羅浮九疑陟嵩衡升峩峩嶺攀岷山窮長江之源後乃入天台雁蕩武夷諸勝杖履所到凡詭奇殊絕之狀一一

寄之於畫前人粉本中未嘗有也吳中評畫者謂石谷看盡古今名畫下筆俱有成處得稱大家尊古看盡九州山水下筆俱有生氣並稱大家兩人皆虞山人故同論云尊古性伉爽不受纏縛在京師時有故相欲招致其家尊古約曰能不限出入性命及至諸門下帑讎鞫尊古獨長揖言辭倨倨故相敬禮逾厚然見故相權重任久傾軋者多恐將及難堅辭去及故相罹禍時尊古在粵中經六千餘里入都相與哭別旋南還晚歲有制府係舊識具書幣招往秦中既至聞制府縱恣無節曰安有繆鑿如此而今終者遂策馬還竟不往見途中惟寫終南雲氣武功太白諸圖以壯行色聞者高之性孝友葬大父母不諉之世父後葬父母不諉之弟後世父未葬者葬之弟之子貧無歸分已產給之餘如養姊妹之寡

卷五三

墓誌

八

者恤姻族之乏者周故人之單寒者歲以爲常客至燕飲嘯歌日夕不厭四方餽遺費盡爲度不留後日毫髮計少時學畫從邱高士嶼雪入都後師麓臺侍郎然每與人言淵源所自曰我邱先生弟子也旣老寓吳有以畫請業者講貫不少休嘗言畫品超逸過於沉着然不沉着不能超逸又言吾所指授者乃馳轡古人之途若骨相丰采精神氣韻隨其人性情學問變化之母沾沾面目爲也前此吳中久無畫師沈文唐仇風流遼邈得尊古提唱而陶鑄之南宗正傳或仍在後賢繼續中而尊古沒迄今無聞尊古號曠亭又號獨往客晚又號淨垢老人世居常熟之唐墅鎮以雍正八年四月二十五日卒距生順治十七年二月初九日春秋七十有一配倪碩人事上接下動中禮節使尊古走萬里外無內顧憂者碩

八力也子理常熟縣國學生孫大年歲乙卯某月某日將卜兆於吳縣某原請銘憶丙午歲尊古嘗飲予以酒謂他日得子志我墓是吾願也而今果然銘曰

畫師心心師天歸自然神理全急奔義避權貴散榮利身無累行萬里憑孤筇歸去來藏幽宮人云亡粉墨在煙雲中永不壞

翰林院編修蔣君墓誌銘

錢陳羣

同年友蔣君諱恭棊字維御一字迪甫其先廣陵人後徙蘇州五世祖育馨以舉人知清流縣高祖燦由進士官至天津兵備道曾祖圻以子緝貴 贈奉政大夫祖鉢 馳贈考溶封並如君官君生四歲卽通四聲讀書過目不忘十歲爲文章有奇氣十四補博士弟子員時華亭張文敏亦以五經受

卷五十三

墓誌

九

知學使者江左文士矜奇耀異人握靈蛇之珠而張蔣兩君獨守先正矩矱所爲文流傳都下安溪李文貞見而歎曰是今日之思泉震川也後文敏數年成進士以 廷試違式落第夷然歸里益肆力於古又七年與余同成進士入翰林充玉牒館纂修官一時制誥典冊出君手者輒爲院長所賞激以封公七旬假歸上壽里居七年極色養之樂

今上卽位之初昭回之光下飾萬物天下文士爭自濯磨與時而奮封公以精力尙強命君北上供職充 大清會典

五朝國史館纂修官居無何以原官休致適封公以哭長子過慟朝夕奉侍未嘗須臾離膝下先後居二親喪哀毀骨立時余與張文敏同事西曹公餘屈指當代古文必推迪甫每欲邀余公裁薦剡旣而文敏以疾去不果辛未二月

法駕幸吳中侍直宮門蒙

溫旨垂問

賜內府緞疋

余時忝扈從見君於豹尾班後則鬢鬢皓然矣癸酉冬德州盧君抱孫再擢兩淮都運延君主安定書院諸生慕君名擔簦而來者咸虛往實歸君自誦曰吾雖老願以平生所得公之諸生當不負盧君也余適訪盧君於邗上盧君招余兩人飲花下賦詩以紀斯會數日余辭歸長水未浹月而光嶽等已扶櫬歸吳門矣盧君經紀其喪人皆以君篤於友誼卒得友朋之助云君湛深經學詩文無專師於唐宗少陵義山於宋愛廬陵臨川藏書數千卷皆手評數過著述十數種光嶽等方編輯授梓君生於康熙庚午十月二十三日卒於乾隆甲戌六月初四日年六十有五娶朱氏先君卒男七存者光嶽道恢師郊皆能世其業女五孫男三孫女五以乾隆二十

卷五十三

墓誌

十

年十月某日合葬於長洲縣二都十五高福字圩銘曰

余少賤走

皇都儔衆中揖二厨評道藝說唐虞雲間張吳

趨蔣一扶搖雲霄上一守官師儒長尚書星隕岷岓郵詞客

又訣邗水溝低徊往事五十秋感舊一哭霜滿頭魂歸來兮

樂斯邱

通許知縣潘嵩岬先生墓誌銘

魯九臯

先生諱甫生字中及號嵩岬某之姑之夫也曾祖一猷祖大璘康熙乙丑進士授內閣中書舍人某大母之父也父霽康熙已卯舉人揀選知縣母涂太孺人潘氏故吾邑大家也世以科第顯而中書公尤篤行一門雍雍孝友禮讓識者推醇儒焉先生之生也猶及中書公所稟既粹耳孺目染又皆盛德之事故其爲人內剛外柔卽之藹然可親而久而彌可敬

愛然或以非禮試之則介然不爲之動也某自成童後嘗獲侍於先生二十餘年從未見其疾言遽色雖子弟有過但正以教之俾其自化不加怒也性好清靜自先姑之亡年方壯以既有子矣遂不更娶終身閉一室焚香讀書時賦詩鼓琴以自娛然未嘗表暴也與吾父相得甚先大母在日先生歲時必來省問終日相與處不少間先大母年九十二吾父以歲貢需次得廬陵縣訓導檄至吾父以終養辭戚友或疑之惟先生與疑齋陳先生道以爲然也乾隆乙酉某邀選拔吾父亦老矣某不與計偕或勸某行謂可因以求仕者先生曰子豈可仕者哉不往是也邑當事有與某故者時相往還先生戒之曰子宜自守以正卽公事非子所宜與也蓋某之所得於先生者如此先生年二十七以邑庠中式康熙甲午舉

卷五十三

墓誌

十一

人屢上春官不第乾隆七年謁選得山西和順縣知縣丁母艱未之任服闋分發河南候補屢協賑災傷規畫悉中條理旣乃補通許縣在任二年餘務以躬行化民丁卯同考試所得士皆有學者無何以失上官意罷歸某之所得於先生者皆先生旣歸後事也先生年八十有二猶康彊偶得微疾卽預書遺令戒其子勿作行述某至前省疾并屬親友勿爲哀誄之文以爲繁辭飾聽非所以遺死者以安也未幾遂卒故某於先生少壯之事不得詳焉然卽此以求之則先生之爲人亦可想而見矣其卒也以乾隆三十四年五月二十一日子一曰鎔太學生吾姑氏所出也孫二曰璉曰昌宰皆太學生先生旣罷歸以父母未葬日經營宅兆久之乃得吉壤於西源比卒遂命從葬焉又二年乃納石銘曰

德言盛禮言恭粹而純金玉容綴斯銘想遺風

贈儒林郎汪君墓誌銘

杭世駿

汪君扶搖旣沒之九年其孤韜英將卜葬於長興之鳳凰山先期來乞銘按狀汪氏先出自魯成公少子六十一傳至大父公始遷江南遂爲歙之休甯縣人祖考建烈誥封奉直大夫考勇錫敕封文林郎君名純扶搖其字也少而岐嶷秀異寒鈔暑講書若宿讀筆飛墨騰文若宿構以是絕爲大父所憐愛在羣從中獨有銅槃異饌之奉年十八爲諸生祭酒兼該羣業於春秋經尤邃謂金華宋氏之論自元以上言春秋者凡五變今則變益多而其流愈下青田之明經環谷之要訣祇以供末學科舉之用降是而匡解明微諸編則又變諸生爲學究爰是銳意傳疏左右采獲抉幽探微雖儒宿

卷五十三

墓誌

十一

莫敢抗手閔後進皮傅目瞋杜鄭王馬之書舉場發策緬緬紛紛蒙目張口乃條食貨刑法邊防州郡數大政州署部居補山堂之考索續源流之至論以饋貧藥儉其窮究元本若此遭大父喪容色貶瘁嘔血數升丁所生憂齋居廬墓三年不入內春秋諱日素服上食擗號孺戀終日以爲常有四兄皆能文事昕夕過從清談千雲握衣躡履親執食器友誼謙篤感動隸人初娶於徐未廟見以渴疾卒過時而腹悲繼娶於陳雅相禮重不畜華妍其內行醇謹蓋天姓也晚築畫溪草堂於雉城遺編鬻翰旁蒐罔羅巾幘之歡徧於大江南北扁舟造門莫適賓主捶琴刻燭造韻立成君外和而內毅侃侃自立期爲有用之學屢試不得志雍正丁未以疾卒於長興之里舍年僅四十有五子一人卽韜英州司馬 敕授

儒林郎贈君得如其階銘曰

於維春秋微婉義悉淵源夙承助逮匡質朱墨別異微旨迺
出嗣永嘉陳不改科律堯彼荆舒新義机軌農師佐之歷駢
整躡權衡有敝集解有轍牙角撐拒未究曲直鏗鏗康侯顛
議盈帙魯史聖文書法兩失黃澤而降正學在歛寬以纂疏
汙用師說師山考傳疑誼則闕有儒一生汪罔來葉世歷五
變鴻論秩秩爲左鍼盲爲梁起疾爲羊輸攻海涌嶽立誅諛
發潛視此丹筆昊天降訥車軸早折靈幽體翳遺著滿室我
造銘辭徵以素業授經何人鑒於哀石

溧陽縣教諭鐵夫韋君墓誌銘

劉綸

乾隆二十八年癸未

上築天下貢士於廷蕪湖韋子謙恒由

卷五十三

墓誌

三

南巡召試

賜舉人官中書至是傳

制一甲三名進

士及第授翰林院編修時余以讀卷官再充教習庶吉士韋
子旣旅晉卒業則越席抱狀請曰我先君之歿垂二十年生
平學術官方流破人口願乞一言納諸篋而同館鄉先輩具
言韋子樸誠士不敢以溢詞欺親先生毋固辭乃撫其行實
之大者誌而系之銘誌曰君諱前謨字儀哲鐵夫其號先世
當宋南渡時有隱君諱許者自西江卜居蕪湖累傳至公高
祖贈文林郎諱受薦曾祖 封朝議大夫諱一教祖順治乙

未進士歷官吏部考功司郎中諱茲佩考授文林郎知河南
新鄭縣事諱聖功所至具有聲蹟君以名家子治經曉師法
年十七補學官弟子員五試不得解乃以廩貢注泗州訓導
歷金壇訓導遷溧陽教諭尋移疾以歸君生平課諸生必首

告之曰庸學飾經義亡實用其弊視荒經爲甚爾諸生勿蹈此諸生有內行不謹者所聞得實當庭跪其斥之其人嘿感悔無後言溧陽王生某者其弟卒官武城令比喪歸遺孤猝殤於疹丹徒陳生故與王某有隙遂以圖產謀殺介府教授屬君納其贄申治之君峻卻不撓而訓導某獨牒上有司窮治不得實然王氏以延累家竟破後兩學官次第暴疾荒忽呼王武城而斃君顧家人曰我嚮不受賕義自應爾孰謂冥謫不爽其信且速如是先是泗州積被水額賦以次報蠲後水勢浸落有司籍上涸出新淤二則分年復業並請增設潼安衛理其事君奉調佐邑令勘實條具奸胥舞弊文狀甚悉大指請除一地兩科已報淤復報涸與報涸而實未涸者大吏采以入告 詔報可汰冗官釐正課歲減溢額租七千有奇

卷五十三

墓誌

西

民以爲便夫府州縣學宮儲材之數也教授學正教諭訓導人師之範也其秩輕守重士大夫顧以早歲不獲躋通顯往往需次至氣衰日暮不得已俛首狎就之詭訾者且目爲贍貧優老地而上官亦僅憐其投閒戀棧不復以課最關之卽不自菲薄無以揚其職觀君在官所自効有不泚頰浹背庶斬一雪斯言者哉君至性過人邁古太安人暨新鄭公之喪皆盡哀盡禮以弟病乏嗣立遣三子成龍爲之後殮葬悉以身肩之晚繪授經圖一垂髻捧書其側者編修君也其志行醇茂爲學術官方之本益如此君生於康熙某年月日卒於乾隆某年月日得年六十有六配甘安人繼周安人並有壺範先君卒生子七長天棟次乾隆丁卯舉人天稔次縣學生成龍出爲季父後皆甘安人出次卽編修君謙恒次縣學生

震蒙次履泰次鼎復皆周安人出女三孫八孫女六曾孫二
曾孫女一以某年月日葬某山之阡銘曰
匪道奚蹈匪教曷造嗚呼君乎神所勞其甯弗攬其貞用亨
嗚呼君乎天所旌

卷五十三

墓誌

五

湖海文傳卷五十四

青浦王 祖德甫輯

墓誌

光祿大夫 經筵講官太子太傅東閣大學士兼工部

尙書陳文恭公墓誌銘

彭啟豐

稽古三代忠貞篤業之臣罔不終始典學懋明厥德用能左右宣力允孚於萬民自秦以降法令滋章當塗之士苟合時變詩書所陳動謂迂濶本末橫分內外決裂學失其統而人才壞毒流於民非一日之故也

聖皇御世大道重光二三大臣往往能古訓是式以忠實心達於政事贊太平之功茲非所謂咸有一德者與臨桂陳文恭公當

卷五十四

墓誌

今皇帝時任節鉞最久已而入相當世士大夫蓋莫不推公之學以爲有古大臣風公固未嘗以學自名而人之推公者覘於其政而知之也公以雍正元年舉鄉試第一成進士選庶吉士明年授檢討遷吏部驗封司郎中攝文選考功兩司公正有聲七年遷浙江道監察御史在臺中所陳奏務持大體監生舊有考職之例試者多屬人代作

世宗知其弊 勅令自首而州縣吏胥藉是爲擾害公請止禁其將來而免其自首

上召見徵詰再三公申論甚晰乃 允公奏

上以是知公 命以御史知揚州府得便宜奏事已而丁父憂上官留之辭不許旋授江南驛鹽道仍帶御史銜攝安徽布政使又丁母憂奉 命留任因乞假歸葬十一年授

雲南布政使乾隆元年以吏議降三級授直隸天津河道五年遷江蘇按察使明年授江西布政使甫到官遷甘肅巡撫未行調江西八年調陝西十一年調江西尋調湖北入覲時川陝總督慶復征贍對陳奏軍事多隱蔽懼公發之乃劾公十二罪部議落職

上原公命留任明年再調陝西權陝甘總督十五年授兵部侍郎仍留巡撫任其冬入覲會河決陽武

上命公權河南巡撫往來河堤塞決口十七年調福建十九年復調陝西明年調甘肅再調湖南二十一年又改西安明年調江蘇入覲已而遷兩廣總督疏辭不許二十三年以總督銜還江蘇巡撫任加太子少傅明年以捕蝗案削總督銜二十七年以失察滄墅關奸胥部議落職

卷五十四

墓誌

二

上命留任尋復調湖南權兩湖總督明年遷兵部尚書入京改吏部公在外三十餘年歷省十有二歷任二十有一所至之處無問久暫必究悉於人心風俗之得失及利害之當興革者籌其先後以次圖之每有興作人多以為難成既而輒就理或當更代卽以聞於朝責成受事者其察吏甚嚴然所舉劾必擇其尤不肖者一二人而他吏率凜凜就法惟恐及己公之學以不欺爲本與人言政輒引之於學以爲仕卽學也盡臣心焉而已故其所施於家國上下之際者務各得其理人咸安之在揚州以廉惠爲治淮揚被水民多流移公奏請民所過處官給口糧護送回鄉里得補入賑冊報可造獄舍置田以益囚糧先是鹽使者令淮南於稅額外歲輸銀助國用自雍正元年始積數十萬注冊報部然實不以時

納及奉部檄移取始行追徵公言新舊相仍虧欠日積請自今停輸助之欸以恤商人頃之

詔如公請在雲南時方

用師猥夷運糧者苦道遠公改爲短運遞運法民便之山有銅廠向召民開礦以資鼓鑄後民苦廠官煩苛工費薄遂相戒不前公請量加工費除抽課外聽得自賣礦銅民爭趨之已而更鑿新礦銅日盛遂罷買洋銅之令立義學七百餘所刻孝經小學及所輯綱鑑大學行義諸書頒行各學令苗民得入義學教之書俾通文告其後邊人及苗民多能讀書取科第公之教也初公之葬親歸也奏廣西墾荒之弊時外吏多以勸墾爲功廣西報墾者少巡撫金鉷請令罪廢職官及外省官生墾田報部以額稅抵銀得官於是貪利者多與有司相結按額荒冊責民報墾給之工本卽以爲已功又訪民間田浮於稅者冒爲新墾起科報部多得官去報者至十餘萬畝然田不增而賦日益民甚病之公目覩其弊奏請罷前

例

世宗命言之督臣尹公繼善分條定議會撫臣勘驗虛實

今上初元公恐撫臣尙護前失再上奏言有司勸民報墾百無一實又粵地磽薄一年耕必以兩年息地力計三四畝始抵膏腴一畝之利若聽其冒墾勢不能支民必流散請將報墾抵捐之田盡數豁除不煩再勘惟民之願自墾者聽之勅部密議而撫臣申辨至再公復極論其非是

上以公粵人累陳粵事恐啟挾持有司之漸因有天津之

命既廣督楊公超曾與新撫楊公錫紱會奏豁除抵捐之田一如公請公在天津訪求水利時乘小舟沿河上下嘗曰老

河兵是吾師也河間滄景諸州最窪下恃隄防爲衛公相其夷險築遙堤月堤縷堤又行放淤之法汎水盛漲多挾沙而行導之由左口入堤停水沉沙復放水從右口出如是者數四窪地悉平滿成膏壤又計北河全勢議濬黃河故道多開溝渠俾水歸於河河歸於海庶久遠無患害司河者以費煩寢其議爲江蘇按察設弭盜之法重誣良之令嚴禁親喪不葬及火焚親柩者在江西歲饑糶常平倉粟令富人毋遏糶遣官告糶於楚且招川湖之商人各載米至更設廠賑粥發帑修城垣築堰埭令民就食於工其他在陝廣諸省遇荒歲酌盈劑虛以濟民食多此類也南昌城南羅絲港爲贛水所趨善衝突建石隄以禦之左蠡朱磯當衆水之衝往往泛濫爲災亦築隄百丈水患稍平江西居人族大者多立宗祠置

卷五十四

墓誌

四

公田以通有無然好訟費皆出於公田公仿呂氏鄉約令各舉賢者爲族正平其鬪爭導以禮法治陝西尤以農桑爲先務陝西本古蠶桑地近世漸廢棄布帛皆資東南諸省公立蠶局募江浙善蠶織者導之令民種桑養蠶不能自織者賣絲於官頃之利漸著西安華州織練充歲貢又勸民養山蠶種山薯儉歲以充食又修治渠泉製水車教民斥水之法鑿井二萬八千八百有奇旱歲得以溉田河南歸德地窪下與宿遷爲鄰故有巴溝以通下流久之淤塞公在河南疏巴溝歸德賴之既至福建值米貴內地俱仰食臺灣商人自臺來者例一舟不得過六十石關吏因而厲之公請弛禁以便民從之在湖南歲大熟適江南饑公請發濱水倉穀二十萬石以濟之買民間穀還之倉又招民墾雲龍山下荒地禁洞庭

居人壅水爲田以寬湖流水不爲患初撫江蘇時吏治刑弊公率之以勤立期限以清案牘興其廉者能者懲其貪墨者而人知奮思蘇俗好華爲具條約宴會服御不得過度止婦女毋遊觀禁僧道爲靡曼之音而痛懲其淫者州縣官故以收漕爲利痛乾沒無已自尹文端公爲巡撫時極意梳剔所部肅然至公申明舊章民用不擾自公去後有司稍稍得自便而民乃益思公不置也前公撫江蘇者在我 朝推湯文正張清恪爲最賢然二公俱遭讒構賴

聖祖曲全之亦旣不安其位矣公遭逢勝於二公爲

天子勤求民瘼彌縫補救矻矻不忘未嘗與人立崖異要自不爲苟同而人莫不稱公以爲二公之亞也公治南河大要因其故道開通淤淺俾入海迅疾幹河支河互相貫輸俾毋

卷五十四

墓誌

五

阻塞在淮揚所請疏濬諸河甚衆其支河督民各開小溝以達於幹時其蓄洩徐海諸州多棄地異時河流未通遇雨輒淫溢河旣濬水有所洩令民以開溝之土築圩圍成腴田中通涵洞爲旱潦備其窪下不能避水者令民改種蘆草栽其糧賦至築堤岸修閘埧多因地勢爲先時之謀奏上輒

命與河臣議行之其在蘇州議開徐六涇白茆口以洩太湖築崇明土塘以禦海開諸州縣城河以通渠皆利民之大者公在吏部巨細無不詳審所司持案牘白事當機立斷無留難旋加太子太保二十九年

上特設漢協辦大學士以

命公三十二年遷東閣大學

士兼工部尙書公在

上前所陳奏雖子弟不盡聞其他修舉職事非有關民生休

戚者茲弗著三十四年公有疾屢乞歸

上慰留再三三十六年春病甚始聽致仕加太子太傅食俸如故 賜詩及冠服 命公孫蘭森送公歸會

上東巡公由潞河南下送 駕武清寶稼營

上慰問良久乃行六月三日薨於兗州之韓莊

上聞憫悼 詔入祀賢良祠 賜祭葬諡曰文恭公諱

宏謀字汝咨門有古榕因號曰榕門先世湖廣人明末避亂遷廣西家臨桂西鄉橫山下曾祖諱道威祖諱世耀父諱奇

玉俱 贈資政大夫河南巡撫曾祖妣周氏祖妣駱氏妣劉

氏皆 贈夫人公早歲刻苦自勵能文章內行修飭爲諸生

卽以澤物爲己任常曰吾生平恥作自了漢及入仕益講求

經世策所與交多當世偉人慕古人以人事君之義奏薦陳

卷五十四

墓誌

六

法屠嘉正李元直王喬林任宏業衛哲洽俱可大用京察自陳舉雷鋹潘思渠自代

上詔求明經之士公再舉陳法及孫景烈世以公爲知人所至尤加意書院厚諸生餼聘賢者爲之師導以正學時至而面命之患諸生文不衷於理每試士必爲發明孔孟之旨以反身實踐爲歸他如社倉育嬰養濟諸堂必爲之計畫有無慎擇主者俾無以虛文塞責蓋公之惠於士民者如此此可以觀其學矣公著書有養正遺規教女遺規以訓於家有訓俗遺規從政遺規在官法戒錄以施於民有學仕遺規以砥世之仕而不學者其奏疏文檄具載培遠堂存稿中公薨之年七十有六妻楊夫人先卒一子殤以兄子鍾珂爲後乾隆六年舉於鄉孫三人蘭森官刑部山西清吏司主事次蘭懋

蘭枝曾孫二人兆熙定熙女六人太常寺卿謝溶生太學生
蔣本廉縣學生曹云瑤秦之埏陸之燦劉某其婿也曾孫女
二人長適韋洽中啟豐繼公入翰林與公先後同朝知公審
又以養母歸得親被公之化不忘於心公喪過吳門旣爲詩
以弔之鍾珂將以三十七年二月朔日葬公於其鄉東畔嶺
之原而先以墓志請義弗敢辭銘曰

太平元老克承天休日嚴祇敬以告嘉猷公自文學遂隸天
官羣吏之治旣詳且殫

帝選明德靖其正直公始親民獨攝諫職上德下情公處其
間功雖方隅補天下患公勞于外之翰之屏入爲平章老成
典型 恩命洊至退若無憑乃心報稱夕惕晨興豈無盤
錯公忠不避豈無細過

卷五十四

墓誌

七

帝信不忌昔有先正如湯如張公繼厥成行業彌光世澤之
長沐浴高厚易名司勳千秋永久

內閣學士張公墓誌銘

姚 鼐

故資政大夫內閣學士兼禮部侍郎桐城張公者 贈光祿

大夫諱士維之曾孫 贈光祿大夫諱秉彝之孫而太傅太

學士文端公之子也雍正元年 恩詔開會試科特文端

公薨公之兄太保文和公已爲戶部尚書充會試考官矣公

以舉人例避不與試值 特命官別試迴避舉人於是公

成進士改庶吉士授編修遷左贊善歷翰林院侍讀學士詹

事府詹事

今上卽位以公爲工部右侍郎公在翰林常充 日講起居

注官起居注素無條例爲者繁簡任意漏遺冗贅不稱史體

公精思爲之寒暑在館十餘年編載詳贍

上以爲善於其職於是以工部侍郎兼起居注官事 本朝
官不爲翰林而仍職注記者獨公爲然爲工部侍郎數年轉
內閣學士兼禮部侍郎又二年遂告歸公爲人誠樸篤謹細
微必慎每當入朝自書職名讀之曰某官張某又屈指計
之曰幾字視紙上三四而後敢出奉使督江蘇學政遇試士
日公服竟日燕處不脫人問之公曰取士國重典也敢忘其
乎其爲侍郎謹奉法度而絕私阿旣告歸則益以舊德篤行
自守所爲喪祭禮制多合於古足爲法式其自奉甚陋或人
所不堪雖其家人皆竊笑之然至族黨有緩急出千百金不
惜也未嘗私受人一錢門生某爲江西巡撫過公居奉數百
金爲壽公曰吾幸足衣食安用汝金爲又有以人葭寄公者
公曰吾生平無病烏用葭少爲宰相子久居京師冠蓋之間
而終無世故之態遇人無貴賤率意而言必忠必信是以天
下之士皆爲公長者公諱廷瑒字桓臣兄弟六人其四皆貴
長少詹事廷瓚仕

仁皇帝與文端公同時次太保大學士廷玉次禮部侍郎廷
璐太保禮部侍郎與公皆仕

憲皇帝及

今上最久公之歸也禮部侍郎及太保前後皆告老而公最
後沒

士間顧謂左右曰張廷瑒兄弟皆舊臣賢者今盡矣安可得
也因歎惜久之公卒於乾隆二十九年八十有四夫人吳
氏子二長若泌舉人次若渠副榜貢生以乾隆三十八年某

月日合葬公夫人於桐城北投子山麓銘曰

德葆以居才託其餘取安吾心不爲人夸士誰能然惟公之行繼成於學始秉其性再世卿相家胡不墮厚植根苞天則祐之我銘其幽所陳者信後世識之以固無盡

光祿大夫

經筵講官吏部尚書諡文肅王公墓誌銘

汪由敦

乾隆二十一年夏吏部尚書臣安國言臣父卜葬於天長縣西有年矣墨食不協迺有後艱願得歸遷兆域以展臣私皇帝曰明歲春將南巡江淮汝其從是兩盡也曷待之公拜稽首公素羸病咯血越數月疾大作疏請解職

上知不能視事命從容就道於是朝之卿士咸惜公之去而願公之過有喜也二十二年春正月病革訃聞

卷五十四

墓誌

九

上爲之震悼賻內庫白金卮喪具孤子念孫奉遺疏進得

旨賜祭葬如制閣臣考諡典以

聞應法

予諡曰文肅

於是念孫件繫公事狀以函堂之石爲請由敦與公同年舉進士同館同朝三十有四年熟知公行已立朝志節事業之素其敢例辭按狀公諱安國字書城號春圃先是蘇州人明初遷高郵歷世載德潛而未耀有諱開運者治尚書有聲州學是爲公會王父子諱式耜通五經康熙戊午副榜貢生恬於任進教弟子爲人師是爲公王父公之考諱曾祿守家學爲諸生研精理學教授後進雍正癸卯選拔貢成均母車太夫人生公時夢得古鼎之瑞三世俱以公貴考 贈光祿大夫禮部尚書妣 贈一品夫人公復推考妣意以身所得封典馳贈外父母如其階蓋異數云公生而端重不與羣兒

戲七歲就家塾從贈公受書即求訓誥大義十歲屬文能自樹立恥爲勦說雷同年十九補博士弟子員第一康熙丁酉舉鄉試雍正二年會試第一名

憲皇帝親策於廷讀卷大臣有端人正士之目拔置一甲第二名及第授編修此公受知

憲皇帝之始也旋充 大清一統志纂修官又兼修八旂志

書王子典福建試十一年遷國子監司業十二年充 日講

起居注官遷翰林侍講奉

命提督廣東肇高等處學政

在道陞侍讀學士抵任擢都察院左僉都御史當是時公受知浸深駸駸嚮用矣公之入詞館也嘗語人曰初謁座主高安朱先生先生教之曰學人通籍後惟留得本來面目爲難退而自省面慚發赤由此立志堅定數舉以勵學徒其教國

卷五十四

墓誌

十

子也嚴月課抑營競進諸生講濂洛關閩之學不沾沾講義曰學當識之心見之行事講習討論求其是耳著書垂訓當出之老師宿儒非學者所急也其任廣東學政也粵東山海遼遠初分兩學使以寬考校之期公所部自肇慶以西達於瓊儋皆濱海地文風視南海諸郡縣爲劣公首飭教官以敦品立操爲多士先接諸生嚴毅有不可犯之色而往復辨論不啻父兄之於子弟關學舍爲齋拔士之秀者如千人餼其中親爲授業有司以非禮挫折諸生者公爲執持不少屈其有敗羣而害於鄉者繩以重法無所貰由是人知學使之任以整齊風教扶樹人材爲大地方有司咸知所嚴憚云

皇上御宇元年澄鑒臣工

特命留任四年報滿

召對

晉都察院左副都御史旋擢刑部右侍郎轉刑部左侍郎五

年九月陞左都御史公總率臺綱以激揚爲己任會粵撫以某教官登薦劾公故吏也知其人昏耄不可用以實聞

上嘉公不避嫌怨

命以原銜管廣東巡撫事公曰吾幼

其人而得其位是古人所譏蹊田奪牛也具摺力辭

上不許乃卽任 陛辭之日

御製五言以寵其行聞有

老親復拜豐貂文綺之

賜粵東文武僚吏皆公所稔悉

聞公至不自安者望風引去公與約宥往咎許自新解絃更張治其歇馘無狀者他皆不問嶺南物產素豐海舶往來貨費瑰麗風俗侈靡政治疲玩不飭習爲固然公極意整肅墜廢畢舉倉儲溢羨自制府以下月給白粲若干吏以故事曰公曰非制也叱勿受比數年有發其事者監司皆坐重辟人益服公操積案塵委公爲之決疑牘省留獄歲久不雨公禱

卷五十四

墓誌

十一

於神弗應有盜案心疑其誣一訊得實乃大雨計典察吏不事苛刻嘗曰人才實難且官屢易吏益滋僞易者安知必優於去者乎莫若勸戒使知自勵故不以糾劾求赫赫名凡三年而嶺以南十郡三州咸治會丁贈公艱貧不能辦裝制府請於 朝致賻二千金乃得歸舟至南昌 內召爲兵部

尙書又遷禮部尙書皆未拜居廬營葬旣訖事十一年服闋

乃入

朝視事公故湛深經術嫻習掌故容臺典三禮公所

議必斟酌古今折衷聖籍期於正人心明典制以翊贊 休

明之運雖違俗侃侃弗顧也五禮自朝廷達於鄉遂載在會

典卷帙繁重學士大夫莫能徧觀熟講民間吉凶婚姻各以

其俗尙未遵一爰是取臣工士民所當循用者爲通禮頒諸

郡邑公長禮部爲刪正繁曲一斷以 國朝制度

命充

大清會典總裁官會典與通禮相表裏公因得一手編集每會典進 呈附以通禮悉稟

皇上睿裁改定凡十年而告成十五年充 經筵講官二十年晉吏部尚書明年兼管工部尚書事銓衡具有成憲精密無可出入而蠹吏舉疑似者因緣上下其手或瞰人所不知輒以牟利躁競者爲所愚弄公釐剔衆弊杜絕請謁雖親愛不敢干以私而部事繁委心力俱瘁病有由來矣公起家寒素由巡撫入爲尚書衣食器用不改於舊晏居退食矻矻如老諸生擲秃管點竄丹黃循行書篋參伍鈎索不雜世事門館闐然中年喪偶不畜侍妾一子甫齒相依同寢起其境爲人所難堪而公處之自如十餘年如一日與人言謙和若不勝及臨事持論商榷文義意所不可張目抵几不少避事過

卷五十四

墓誌

十一

了無芥蒂於胸中以是人皆知公心乎爲 國而非好爲崖岸與衆異趣也公清癯骨立疎髻灑然望之嚴氣正性贈公以公年望五未舉子語公曰秋斂春生當養生氣公因自號春圃以志庭訓其篤於踐履如此公所著書自奉 勅修通禮會典外嘗欲兼綜朱子師弟問答之語裒其粹精以附章句更取衆說之衷於朱子者嚴爲去取勒成一書而未竟其業公所重固不在此亦以見公志所存耳公生於康熙三十三年閏五月初三日薨於乾隆二十二年正月初八日得年六十有四元配車氏繼配徐氏又繼配徐氏俱先公卒皆誥贈一品夫人子男一念孫女子一字朱元定卽公女弟之子也念孫將於某年某月某日卜葬公於某阡以三夫人耐嗚呼典型彫謝感愴何已然卓然爲一代完人終始蒙

恩哀榮兼備班行倚重贈無瑕尤在同譜所當致羨而無遺憾者也爰系以銘銘曰

北斗喉舌天官尊三槐世澤貽後昆珠浮巖社川獻珍唱第曾見五色雲峩峩千尺松蟠困峭壁獨立無攀援嶺南開府廉石存秩宗三禮和神人十年鉛槧資討論雲臺博士舌可

捫上佐

天子下臣民周官法度由睢麟山公啟事得二年介不戾物勇本仁不茹不吐樊仲山拜疏請急宜

悲朝紳楚山鬱鬱淮水淪中有大鳥翔墓門君子有穀詒子孫摛詞無愧鐫貞珉

榮祿大夫吏部侍郎恭定吳公墓誌銘

陸錫熊代于文襄

今皇帝興官耆事董正六典慎詰邦禁圖惟其人時則有若

卷五十四

墓誌

三

海豐吳公以持法明允受

上知遇由諸生奮庸汜位常伯折民輸孚壹切倚辦而公亦祇力不懈以迪播彝教

天子嘉其宜毗任貧渥前後居是職者莫與比公既上章乞身歸會

天子東巡謁見行在所詔特以尚書寵公比告薨

於家計聞

上益愴悼祭葬如制下有司議諡諡曰恭定越明年其孤垣壇等將奉公柩葬於邑東之賜塋而先期來謁銘初公

之在朝廷予數相見間就與語樂其人溫溫然而垣壇又先後出予門因稔公事履甚悉迨其歿也會以職事視外制

莫得推明

天子所以寵嘉公之意以褒顯其世今辱垣壇之請不可以
辭乃按公所自撰次年譜刪掇而銘之曰公諱紹詩字二南
其先自遷安徙海豐有以進士起家官山西布政司河東道
叅議諱自肅者公祖考也 贈刑部侍郎諱象默者公考也
代有令聞紹開厥緒公始補博士弟子號高才生會
世宗憲皇帝詔中外舉所知各一人公世父黃梅知縣象寬
上公名班見於 廷公奏對稱

上旨得試吏刑部授七品小京官改督捕主事再遷江蘇司
郎中除知甘肅鞏昌府四歲餘擢西安督糧道爲總督劾免
家居久之

上南巡公迎道旁有

詔問公罷官狀公對以實

天子察其誣起貴州糧驛道再

命按察雲南移甘肅卽

卷五四

墓誌

十四

其省進布政使以內憂歸旣免喪入 覲留爲刑部右侍郎
匝月復拜兵部侍郎巡撫江西 召入爲尙書自刑部遷
禮部未上以歲祲奏緩漕事失期挂吏議奪職居京師數月
上終欲嚮用公乃還公刑部一歲中以郎中復爲侍郎而公
子壇官江蘇布政使方用才略顯進 上乃特擢壇刑部右侍郎而遷公吏部父子相代佐司寇摺
紳以爲榮

慈寧萬壽以齒偕廷臣爲九老

賜杖遊香山圖形禁中

公年七十餘精決如少壯觀者咸歎羨不可及而公尋以老
疾引年 優詔報許且以公諸子官京師去來聽自便蓋

異數也公行內修其於親事生嚴喪死哀篤愛兄弟無間爲
人寬厚長者平常妄言徐視而居官嶄絕有守疑疑然必得

其當出事

天子四十有六年縮職以十數所至輒有聲績在鞏昌爲興書院數親臨之以進諸生朴俗以化歲早發俸鑿買牛種子民耕秋則大熟在西安修富平渠紉豪石專利者沃漑數百頃其在雲南甘肅求利害廢置所宜除建甚衆不赫然爲名而滲人肌膚至深比去乃益思頌之以至持節江西宣

上德意數賑被水百姓劑其贏乏屯租淨額白弛其征視所安便不苟同異其他設施功利大率類此蓋公於小者無所不盡意而決疑平法以慎於獄則尤其生平卓卓大者惟天下亦以此稱之先是公祖少叅卽由刑部郎顯公早從黃梅君習吏事析律傾服先輩黃梅君知其才以是內舉公及厯刑部久益精練絕人考定新舊法式具爲規條梳櫛細密可

卷五十四

墓誌

五

長用起曹屬迄卿貳謹敏終始如一而諸子更迭爲刑官亦皆受公教能其職昔周公告蘇公以式敬由獄其後世爲周司寇聲施至今嗚呼如公者其庶幾近之矣公享年七十八薨於乾隆四十一年十月十七日配夫人王氏婦道純備先公一年卒子二長垣王申舉人掌浙江道監察御史兼吏部文選司事次壇辛巳進士前刑部右侍郎今官江蘇司郎中出爲公從父中書瑛後孫二之承庚寅舉人中書職銜垣出之勤國子監生壇出孫女六垣出者一壇出者五曾孫五承出者四勤出者一婚嫁聘字皆名族銘曰

粹然吳公慶詒前武德孚行聞以御

帝所舉不失親自其躬興練達章式莫之與朋翱翔曹郎遼建旌節內外隨施挹而不竭蹶也孰起

天子毗之往也孰諸邦刑司之折獄哀繹其澤世究拜命於廷父前子後

帝眷耆碩恩禮始終謂將百齡何命不融有煒 褒綸納書告第豐碑螭首以風具位佳城墨食原高水清我作銘詩

用昭厥聲

孝廉于先生墓誌銘

張遠覽

先生姓于氏諱蓋臣字子忠西華下堤人也下堤之于尚勇健好騎射往往秉節旌為大帥田園狗馬音樂之盛甲於一縣而先生獨用儒而貧先生幼讀書敏且勤長而益博在鄉黨恂恂退謙無賢愚必以貌故內雖岸然自異而人人皆得與先生親性介而好施嘗數日不舉火自非其子弟門人餽之弗受也嘗有十金為盜攫去久不得會縣有公事令與縉紳畢會令語先生曰盜金者獲矣金具在即奉金於座先生曰吾人愧貧不能襄公事今聞修縣志願以此助筆札之資令大驚堂下吏相與竊笑曰老人又不欲其家舉火矣初先生於雍正二年舉於鄉至今三十餘年先生之同舉有列官至九卿即最次亦為州縣校官而先生竟以窮餓終先生生於康熙某年月日卒於乾隆某年月日年若干配某子凌雲以乾隆二十五年某月甲子葬於某里某原其門人來謁余銘曰先生之遺言也銘曰

卷五十四

墓誌

六

內振振焉而遭何薄也吏則必廉信綽綽也於社而祀焉云胡作也

翰林院庶吉士嚴君墓誌銘
君姓嚴氏名璵字十區先世自泮徙臨安遂為仁和人曾祖

杭世駿

大法祖模皆不仕考儀煌康熙壬午舉於鄉初娶邵孺人生
兄在昌繼朱孺人生君三歲而考見背朱孺人教之學生有
異稟覆九經如瀉瓶水羈叩爲文動中程度應縣童子試爲
選首己而學使者責君賂不應輒擯不錄雍正甲辰乃用國
子生名舉鄉試庚戌成進士改庶吉士旋患瘰癧請急歸調
疴里門時母夫人屆壽五十方以節孝致綽楔之典築壽萱
堂曲盡色養歲餘疾少痊還京明年疾作卒於邸舍年僅三
十有一蓋雍正甲寅歲五月朔也同歲生倪侍御國璉周修
撰霽梁侍讀詩正爲經紀其含殮奴子兆宗遞其棺以歸時
兄在昌方攝江西萬載縣事不得行服母夫人將以歲乙卯
之九月四日葬君於北山大方井之祖塋以君少嘗兄事予
知君行誼爲悉因命爲誌墓之文君修門內之行居處幽室

卷五十四

墓誌

七

必自修整雖家人不見墮容與長老言捧手負劍唯恐不下
然勇於爲義告之急不以亡爲解友人吳嘉丙貧病以死不
克葬君爲誌其窀穸并刊其文傳之薄遊淮陰鍵戶日課經
史爲文一洗懦鈍之習孚甲新意旬鍛月鍊冥收不已至忘
寢饋極意步天嘗疑雍冀齊魯之墟與鶉首大梁降婁元楊
之躔次多有不合著論以發丹元子之疑又謂筆迹之妙關
於人品鮮發明之者集唐史能書人爲一卷他詩文多不存
唯春草碧色賦有能誦之者君生於康熙甲申十月五日娶
吳氏無子以兄在昌子震爲後銘曰


嚴維賢裔令德載光兩雛軒軒一覽一祥五采旣備德輝乃
翔中道折翅爲孤鳳皇方井之陰龍虎回翰幽宮廣輪擗茨
番闕輿藏馬反禮葬非渴誰與刊銘慈母所揭

湖海文傳卷五十四

卷五十四

蘇志

六



湖海文傳卷五十四

湖海文傳卷五十五

青浦王 昶德甫輯

墓誌

大學士 贈太保梁文莊公墓誌銘

杭世駿代劉文正

皇帝御宇之二十有八載相國錢塘梁公以疾薨於位

上聞震悼 命皇五子詣靈奠醴晉贈太保諡文莊

予人賢良祠 賜內庫白金千兩治喪公有子遠守遵義

乞內侍養已調戶部郎中道遠尚羈職守

上念旅邸無人 命內務府派員經理其事部察恤典具

奏 諭葬祭如例入祠加祭一壇 令翰林院立傳啟

殯之日復奉 恩旨所過沿途二十里內官弁並赴舟次

弔奠遣人護送哀榮禮備冠絕寮采公起自田間受

卷五十五 墓誌

兩朝不世之知遇回翔館閣出入 禁闈游歷卿宰以至延

登受策 隆恩渥澤古罕倫比而筋力且就衰年運不我

與高厚之 恩待酬於萬一報 國之心積繫於寤寐公

雖死而目猶未瞑也葬有日矣隧道之銘孤子排纘行事先

期來請余與公同備 顧問叅密勿朝夕繼見垂三十載

知公特深其忍不銘按狀公諱詩正字養仲號薌林梁氏系

出新里可考者善菴公積從宋室南渡為遷杭始祖著籍錢

塘曾祖萬鍾祖國儀隱德不耀皆以公貴 贈光祿大夫

經筵講官太子少師協辦大學士吏部尚書曾祖母汪祖母

施並 贈一品夫人考谿父公諱文濂歲貢生選授諸暨縣

學訓導不就以公貴累 封如前母凌累 贈至一品夫人

公生有異稟五歲始能言授以四五言詩畧上口即能誦長

擅文譽與兄啟心有二難之目年三十始舉鄉試又五年成進士時雍正八年庚戌也 殿試以一甲第三名及第授職

編修旋充一統志纂修官未散館出典山東鄉試為正考官明年癸丑充會試同考官又明年選入 上書房得侍

今上皇帝暨誠和兩親王講讀九月充 日講起居注官十月晉侍讀明年晉侍講學士凌太夫人病亟乞假遽歸驚聞

世宗憲皇帝賓天已擬束裝疾赴 梓宮哭臨先一日而凌太夫人卒上聞 賞藩庫銀五百兩治喪未期年 詔起入直 南書房 垂問途

次病瘧狀 賜御醫並參藥 諭令以素服入直照現任學士例給俸兼懋勤殿行走 賜外城第宅一區甫釋

服補授侍讀學士充 日講官起居注仍兼 上書房行走

卷五十五

墓誌

二

是冬充順天武鄉試正考官旋晉內閣學士兼禮部侍郎即日充 經筵講官乾隆四年正月補授刑部右侍郎五月調

戶部兼理錢法五年條奏旗丁事宜蒙 俞允十一月轉左六年谿父公年屆七十 恩給二品封典 御製五

言律詩 御書傳經介祉四字以 賜四月奉 命仍兼錢法事務七月扈從木蘭十一月兼吏部右侍郎事是

年充 皇清文穎館總裁官七年二月扈從恭謁 泰陵四月充 殿試讀卷官旋 命閱新進士 朝考卷

是年兼 御書處行走八年七月 皇上親謁

祖陵駐蹕盛京公與扈從

上升殿大宴蒙

恩召赴榻前手賜一卮時與者不過數

人九年六月

賜書清勤堂三字扁額是冬扈從盤山

宮門去內殿稍遠每遇宣喚

恩許乘騎而行重葺翰林

院落成

車駕臨幸

錫宴賦詩賞賚有差公以侍郎

特恩照

尚書品級優賜十年二月扈從謁

東陵五月補授戶部尚書奉

命閱新進士 朝考卷七

月扈

駕幸多倫諾爾十有一年九月扈從謁

泰陵詣五臺十有二年六月充續文獻通考館總裁官七月

扈從木蘭十有三年正月扈

駕東巡謁

孔林次祭嶽廟登泰岱

卷五

墓誌

三

上以山徑險仄

諭公不必隨上沿嶺派侍衛分駐有交

辦事遞傳上下三月奉

命閱會試迴避卷四月調補兵

部尚書又

命閱新進士

朝考卷九月扈從謁

泰陵金酋梗化大學士傅公奉

命經畧羽書旁午一切

臺站事宜資公調撥十有四年金川報捷

特加太子少

師十一月奉

旨暫管吏部尚書事

賜御書宣贊樞

衡四字扁額十二月兼翰林院掌院學士充

日講官起居

注旋

命協辦大學士事十五年正月補授吏部尚書協

辦閣務如故兼教習庶吉士八月扈

駕時巡中洛謁

東西二陵以朱荃事奏對未協罷掌院學士職公經歷四部

遞長六官夙夜在公殫竭心力期盡職而後已其佐司寇也

盡心庶獄精研律例曹司有通曉刑法者虛懷咨詢獄無疑義奇請他比情罪允協譬筦中樞

上以經略與大將軍向無區別 命公釐定章程公博考

前典參酌今制自禡祭啟行以至凱旋告廟條上儀注載入會典及掌銓衡振淹滯抑躁進不徇請託不避嫌謗官方澄敘胥吏斂手在農部最久清釐錢法稽核經費懲各司奏銷之延閣綜直省正耗之盈虛精於心計者不能及也

聖主倚毗既深任寄尤篤明良一德朝野矚望揆席之端兆於此矣十有六年

六飛南幸谿父公年臻大耋公預請扈

蹕歸省 恩給一品封典

聖駕駐蹕杭州越三日奉 命閱召試諸生卷 御製

卷五十五

墓誌

四

七言律詩以 賜並給假一月侍養 御書湖山養福

四大字 賜谿父公台階愛日四大字 賜公 天

章下賁焜耀里閭假滿還 朝從

幸木蘭恭逢

皇太后六十萬壽 覃恩頒詔封本身一品明年以谿父

公失明陳情乞養 御製五言律詩寵行有翻祝歸朝晚

卿家慶倍深之句

聖情肫篤不異家人父子家居二年奉 命與長洲沈少

宗伯德潛同纂修西湖志二十有二年

六飛重幸江浙星赴淮陰接

駕 恩賜在家食俸時尚書汪由敦假歸省墓 命公

隨往江甯代攝其事 賜御製七言律詩又 賜萊衣

書永四字扁額奉

命閱兩江士子詩賦卷扈

蹕至金山行在

聖恩體恤

命歸省侍無何遭谿父公之變伯兄亦以毀

卒勞瘁在疚獨營幽窆

特詔以工部尚書起用陳情乞

假數月畢葬事明年春就道復調署兵部尚書又奉

旨

於紫禁城內騎馬八月充順天鄉試正考官又明年奉

命磨勘會試卷五月閱庶吉士散館卷卽奉

命教習庶

吉士服闋實授兵部尚書十二月

命署掌院事務兼續

文獻通考館總裁官二十有六年二月扈

駕巡幸五臺四月

命磨勘會試中式卷旋充

殿試讀

卷官復

命闕新進士

朝考卷五月補授吏部尚書協

辦大學士仍兼掌院學士事又補充

經筵日講官起居注

卷五五

墓誌

五

是冬恭遇

皇太后七旬大慶敬接

徽號冊寶於

慈寧門奉襄典禮先後奉

懿旨并

上賞賚較廷臣有加二十有七年順天鄉試仍爲正考官二

十有八年六月拜東閣大學士之

命仍兼吏部尚書翰

林院掌院學士事九月

賜內城第宅一區十月晉加太

子太傅十一月以微疾遽薨遺疏不及上公天性孝友太夫

人前逝諱辰及歲時饗祀輒鳴嗚作孺子泣侍谿父公晚年所舉

倍至事伯兒飲食必借弗敢先也弱弟爲谿父公晚年所舉

子愛念尤篤俸餘贍給之外分財產與子姪並三族之待以

舉火者不能悉數也自入仕以至爰立不傍門戶不矜巧捷
樸誠自矢獨結

主知讒公者莫能入愛公者亦莫能助也薦剌人才封章慎
密倖進之徒末由關說左右親近無從窺伺焉總裁各館鉅
細皆經手定去取精當詳要適職巨製鴻裁折服羣彥文章
訓詞深厚辦香南豐詩骨蒼秀廣和 明廷韶英繼響玉

石均調遠播 皇風仰合

聖製爲宋元以來侍從之臣所不及臨池初學誠懸繼叅文

趙晚師顏李格凡三變奉 命編校秘殿珠林石渠寶笈

二書益得縱觀 天府收儲詣力精專天情流美經進時

獨蒙

睿賞屢勒堅珉同列推爲第一公生康熙丁丑二月四日薨

卷五十五

墓誌記

六

於乾隆癸未十一月十有四日壽六十有七初娶于孫繼以
包累 贈一品夫人再繼以徐以子官得 贈如前公子二
長同書乾隆十七年 恩賜進士 日講官起居注翰林

院侍講以綏伯兄次敦書乾隆十二年舉人 恩賜一品

廕生貴州遵義府知府子女子二長適舉人廣東清遠縣知

縣范同治次適太學生吳炎兩子一女皆包夫人出一女徐

夫人出孫男三長王繩仁和縣學附生次履繩次應繩孫女

一今以三十二年二月癸丑葬於邑南之象山三夫人祔焉

銘曰

梁祖伯益以國爲民公侯子孫必復其始顯允梁公早宅

帝衷甘盤舊學四輔道隆發聞詞垣遍歷華省四長六官文

柄屢秉

天子幾暇典學不懈公爲益稷賡歌颺拜

萬乘巡遊雅雅魚魚公爲臯朔常在屬車南浮江淮東登嵩
泰瞻洛觀河經覽九塞公和其聲金春玉應每奏一篇輒動
清聽筆跡淵妙鳳泊鸞停琬琰深刻照耀闕庭公佐
唐虞以道自許爲世舟梁爲國風雨出入綸扉從容丹地
朝夕論思不我遐棄公乘自雲仿側九關景短心長恐孤
國恩丹忱縷縷沒而猶視我知公深銘告悼史

通奉大夫都察院左副都御史雷公墓誌銘

彭啟豐

公諱鉉字貫一一字翠庭雷氏世系出馮翊自唐遷閩之甯
化曾祖某祖某父某諸生三世俱以公貴贈通政使司通
政使公年十七補諸生雍正元年舉於鄉以合河孫文定公

卷五

墓誌

七

薦官國子監學正十一年登進士第改庶吉士請急歸

今上卽位旋

召直

上書房元年授編修三年充

日講起居注官四年遷左諭德以父憂去官九年召仍直
上書房十年累遷至通政使十四年以母疾乞假歸踰年入

朝

特命督學浙江尋改江南十七年遷左副都御史仍

留督學其冬復任浙江二十一年任滿以母老乞終養得

旨卽自浙待母歸二十四年丁母憂勞毀得疾其明年冬十
月某日終於家公之卒也予旣爲文以哭之越一年冬其子
定淳寓書并狀來乞銘予與公同官翰林素知公旣督學浙
江又與公先後相代以是益悉公爲人而歎公之志蓋未竟
也公之學之醇守之固其立朝抗直遇事一無所撓屈其遭
際亦隆而卒未竟其志者豈非命哉方

上御極之初銳意至理在朝諸臣爭自奮思所以稱盛意
公時官諭德每進經史講義必詳晰義利開設端委以推極
於治要

上嘉納焉有同官以喪歸未葬入臨皇太子喪
上意欲留之公力疏爭事遂寢當是時也朝野無事

天子方虛已側席有一善無不庸若谷之應響公駸駸方向
用而適以憂去既服闋入朝會日食求言上書論臺諫以
爲公朝廷樂聞讜言不必疑其好名臺諫之所得者名政
事之所收者實也督學浙江浙西饑無入告者公輒以
聞遂得旨賑貸公既感

上知不欲以虛文答

詔旨亦不肯以職分自諉謝惟

上鑒其誠而信之既用其言復顯其身且使得就官迎養所

卷五五

墓誌

八

以曲成之者無不至夫亦將有待矣而公復以乞養去蓋嘗
論人其器大其意必遠以公之精誠磊落抗節不回且無有
遏塞之者宜不獨此三數事見諸言論蓋已舉其大者矣然
則使公敷歷至今其位益顯其任益重而亦無有遏塞之者
將必更舉其大者以劘切一世而惜乎其志卒未竟也公少
學於蔡文勤公其學一宗朱子不搖於他說臨卒無一語及
私其遺疏云爲子之事粗具爲臣之志未伸蓋公亦自以未
竟其用而天奪之年爲可憾也公配巫夫人子男子三長定
淳舉人次定樹國子監生先卒次定源子女子一適國子監
生巫國維孫男子二女子二以某年月日葬公某所銘曰
器之大小隨所儲瓶甌石殊盈虛峩峩雷公志不渝英辨
挺特精誠孚守以醇古浩氣俱落落數事昭寰區蘊負更與

諸
常人殊厄之歲月未盡舒銘茲景烈垂史書子孫達者其嗣

原任禮部侍郎齊公墓誌銘

袁枚

乾隆元年秋余與齊公次風同試博學宏詞於保和殿一時士論僉以實學推公及榜發

欽取十五人公果與選

余雖報罷而公念同徵之誼最殷後三年余亦入翰林作後進常與公唱和外出爲令始與公別別四十七年余老矣遊天台山公死已久且葬其兄周南弟世南年八十餘龐眉杖延予飲其家抱公詩文集百卷出曰先生視此以志其墓嗚呼當時薦此科者海內凡二百餘人而今則在野在朝屈指無有也公之遭逢寵遇升沉禍福非余後死其誰知之而誰表之謹按公名召南字次風又號息園幼而穎敏讀書十

卷五十五

墓誌

九

行俱下年十六受知於督學何公世堪充博士弟子貢入京師中已酉副榜雍正十一年督臣程公元章以鴻博薦授翰林院庶吉士改檢討

御試高等超遷至侍講學士加

日講起居注官充戊辰會試同考官

上書房行走再遷

內閣學士禮部右侍郎公清癯短身而侷鄉樸之氣溢于眉宇獨能宏搜博覽記性過人

上於甯古塔得古鏡未詳款式問朝臣莫有對者公引證書史羅縷具奏

上大悅顧左右曰是不愧博學宏詞矣

國家疆域恢宏烏

喇巴哈俱置候尉又新開伊犁諸臣奉使者輒先詣齊侍郎家問路公與一册某候某驛應宿何所需若干糧數萬里外若掌上螺紋毫忽無訛或問曾出塞乎曰未也然則何由知

之曰不過漢書地里志熟耳問之讀漢書者卒亦不解沈尙書德潛常在

上前譽天台石梁之奇

上問公公曰荒山磽确不足以勞

聖駕人笑其奏對率易而

上以此益重之十四年四月從

馬驚觸大石上腦涔涔流昏愒不起

上命蒙古醫速治醫列生牛腹卧公其中又取牛腦乘熱納

公頰左右搖公始蘇當是時

上方嚮用公遣

皇子及中使問病者不絕於道又數月公病少痊步猶蹒跚頗忘所記書不能握筆又心念老母乞回

籍終養

卷五十五

墓誌

十

上慰留再四然後許之還浙後主叢山萬松兩書院

上三次南巡公力疾迎

駕皆召見

賞賜優渥先是公有族匪周華者素不良公訓誨不悛遁海外三十餘年忽因浙撫熊學鵬巡城遮

道獻所著逆書揭公十大罪熊奏聞

上誅周華赦公削職歸里公身受

上特達之知方恨無涓涯報而怪民妖言乃出自近族悔平時教勅無素又隱忍不先舉發以致惡彰於天自分雖九死

罪固當而

上復屈法活之恩逾重愧憤愈深結轡不已路上疾暴作還

家匝月竟以不起年六十六嘗言酈道元水經注明於西北

閩于東南特撰水道提綱二十卷又歷代帝王表十三卷後

漢公卿表一卷所修官書則一統志明史綱目續文獻通考禮記漢書考證皆所纂也會祖三仲祖化龍父鼎俱以公貴贈如公官妻張氏封二品夫人子式遷國學生女二人葬台州花坑之原銘曰

天台之山其高萬有八千以是鍾靈生公其間學識其大才擅其全以人視山幾與齊肩雖梟獍嗜其後惡馬蹶于前而終以受知於

天無損其賢嗚呼非我來遊誰表此阡嗣後川湜湜峯綿綿磅礴鬱積繼公而生者其在何年

迺西兵備道唐公墓誌銘

呂星垣

乾隆五十五年歲庚戌觀察唐公年七十有九考終于家公子仁埴狀公行事萬六千餘言寄其友呂星垣請銘墓星垣

卷五十五

墓誌

十一

讀而敬之謝弗敏旣而仁埴躬叩星垣吳縣學官舍再拜請乃不敢辭按狀公諱展衡字南屏先世由海甯遷江都世有科第勲績家素封曾祖之天前明廣東靈山縣知縣當明季高黃爭鎮獨捐金贖被俘者家遂落祖詩逸民高節從祀鄉賢考綏祖康熙丁酉舉人起家封邱令終湖廣總督妣吳太夫人公始以蔭讓其弟秉衡後弟倚衡以兗州府知府

召見

上詢及公蒙特恩以通判發雲南補彌渡通判歷署思茅

同知大理府普洱府元江府知府授普洱府知府擢迤西道自劾落職再授普洱府知府擢迤西道以病乞歸配劉恭人子二侍陞蔭生河南彰衛懷道仁埴乾隆丁未進士浙江仁和縣知縣孫四鈺鑿鑿保葬邑某鄉某阡公在滇十八年

屢洽兵督餉熟練緬甸各猛山川險利鹽竈礦砂情形封疆大吏倚如左右手

上亦知公深顧苗夷叛服不常極撫馭方略始向化公觀察迤西方錄囚至臨安有襲宣慰土司刁維屏以族遁公馳追過九龍江至猛籠弗及遂自劾奉 旨革職留劾既維屏

自歸公復積功復原官究弗象賢厥考以此當 國家用兵

緬甸公之功多而緬甸構兵亦與孟艮召散相終始初孟艮酋死其庶子召散逐嫡子召丙據孟艮召丙偕其臣以先捧來奔召散犯邊不已 朝廷將發兵督臣先至普規畫方略

公守普請分陽武壩至通關十站計里給夫馬餉禁長夫制滾運迨孟艮降民不苦之時緬甸阿瓦酋膺毒勢吞併木梭接些木邦新街煽結孟艮內地隴川猛莽各境騷動又提督

卷五十五

墓誌

十一

李時升輕進失律遐邇震驚公亟請以叅將哈國興提兵馳至軍收時升以兵授國興揮使力戰大破賊國興遂知名公遂持重按兵待 朝命於是丁亥四月明公瑞以定邊將軍

出統兵用降人召丙以先捧嚮導召散聞益發兵助緬明公乃檄公兼守元江公行召散攻猛彝普洱甚急公輕騎沿途募練復揚言遣以先捧率大猛養選襲孟艮公乃揚麾入普

賊震兵威驚後襲遂逃明公奇之請超擢太守公遂閱普籐至九龍江數百里兵火虛落招徠撫綏量土宜給籽種以集流亡召散猜復結召功犯猛籠自攻三臺山公立遣猛遮敗

召功猛海敗召散召散退復謀內犯明公乃使總兵官佟國英七十一駐猛角猛養爲犄角明公乃從普發兵檄公閱伍辦裝治仗公晝夜盡瘁明公歎重明公遂以輕兵由新街進

攻錫箔一鼓下之過天生橋一日十三戰皆捷破十八壘直抵宋塞阿瓦行滅矣明公遽染瘡糧竭還猛育薨于軍大兵初還將軍道沒邊圍驚公竭方略鎮定而候者輒報賊竊發公遂以己丑正月偕兩總兵出兵打樂遇賊日三戰皆捷賊退繕守固是年三月傅公恒以經略大將軍至永昌督師以普洱獨當西南面乃移軍需局永昌設軍門行臺普洱委公總理傅公持重先招懷旁近時安南國王黃公纘爲下黎維禧遂率四百人款寨公啟經略納之安插思茅州那可樂地撥給籽種牛具遂招撫南掌國王王弟召翁者舊聘纘女媽鼎未婚公請以媽歸之南掌臣附請貢公更以經略檄繙繹諸國體書馳布遠近皆恭順無助阿瓦孟良者是年冬經略出師由猛拱木邦以往皆望風欵附遂往據阿瓦上游老

卷五十五

墓誌

十三

官屯阿瓦震慄始降奉

詔班師留副將軍阿公桂善後

公治凱旋竣陳阿公善後四事一安設屯練請九龍江外北至整蘭南至打樂倣古寓兵于農卽各猛選練進充伍退歸農二撫恤流民請車里外區田築舍照常平社倉建倉散給各猛春放秋還俾力開墾三增積米普洱兵儲例支二年倉猝運餉糜帑請撥五年四徙降人軍興用以嚮導而苗姓樂黠各猛厭苦不徙并患煽搆請徙內地飭各猛就近管轄阿公次第條上行之故迤西一路戰守有資排鑿復業公審知九龍江內十三猛江外八猛界錯緬甸中復有野夷一種出沒剽掠無常捷如風鼠而各猛習野鬪不矜步伐其器械惟標鎗短刀往往爲野夷困公訓練弓矢火器步騎成習爲設瞭樓置候馬埋伏弩野夷逃邊微嘗公自劾復起卽招降革

裏雁部曲於猛籠又遣吏目盧驥招降整欠酋召教又馳按
普籐酋阿別刀二焚剝巨案皆軍書旁午出別才赴他屬奏
功其理永昌軍需分緬案尾案爲一百八十一事核准銷九
百二十四萬六千八百餘兩其核減者分全賠分賠獨賠訟
免四項皆報可三守普洱民尤懷之公初理湯丹銅廠爲滇
銅廠第一墮欠久懸公特慎客本支放嚴辨礦色一時客長
爐戶竈丁皆勤儉墮額不缺及理威遠鹽井一力培養商竈
私靖官行商民利便相度普洱城南海子河爲疏通之由清
水驛入金江灌田數萬頃又登西山望草海見秋水獨盛慨
然曰是可瀕而耕也爲鑿河廣五丈深丈建閘下游時啟閉
數十里成沃壤是年植麥越歲植禾其精理財如此顧在普
議開白馬山銀礦上下歆動公力止之謂聚數萬失業人鑿

卷五十五

墓誌

十四

山無礦則散之甚難尤有定識益少侍總督公習吏事其精
神亦副之前後 召見

上備問家世及軍政欲大用公公以篤疾歸

上惜之公訓子甚嚴嘗就仁埴養至岷縣仁埴每趨庭公曰
事竣乎曰竣始命坐有投到未讞者輒輦蹙曰汝惰一刻民
累一日有命案必曰作作不可信也必親閱寓訓侍陸曰黃
河挾沙行病在沙治在水法宜激之怒直暢其勢曲殺其威
母怠工也而不可迨母爭土也而不可讓治上游察下游吃
重防北岸顧南岸當衝皆名言尤愛惜人才訪敬奇士貌清
癯而性溫和及臨大事決大疑一言立解蓋綜核行狀約誌
其平生若此銘曰

惟孝謹宣勤能事迺壯哉馮唐魏尙其克勝哉東西南之甲

仗兮解組綬予行勝怡就養兮訓于吾曾雖未使相厥惟股肱千載慕訪窆銘是徵

宗人府主事孫君墓志銘

邵齊燾

君諱夢遠字中伯姓孫氏江蘇昭文人世居邑東偏鹿阿鎮遂爲著姓祖麗公四川什邡縣知縣父爵昌太學生並贈奉直大夫君性尚疎簡氣度明豁吃於言辭偉於形貌不矯飾以取名不苟同以徇物剛毅木訥體近仁之姿直諒多聞標益友之目年始舞勺能爲文詞遂絕意嬉遊究心篇翰有核羣籍軌涂先正十九歲補縣學生三十歲遊京師中雍正十三年順天副榜

今上乾隆元年補宗學右翼教習太常卿同邑陶公正靖經術史才儀型後進君升堂承訓辨析源流器識日充文體彌

卷五十五

墓誌

五

上於時四方英俊以鴻詞被徵及異等充貢者雲集輦下咸聞聲景附氣類相求君遊道日廣華譽翕習矜標格以相許恥干謁以自媒故以名傾青槐之市迹絕霜戟之門三年中順天鄉舉七年成進士不樂簿書遂棄銅墨改秩教授待次家居迺吏謝遣聲華屏絕人事研精文繫別事筌蹄以爲易蘊至深然理藉詞顯而諸家穿鑿或離析任意或附會承訛縱有新意殊非本指於是脫棄九師精求十翼務使考辭必順釋理皆從撰讀翼揆方凡十卷十六年

翠華南幸吳

越今江蘇巡撫太子少保番禺莊公有恭昔與君共事宗學

有尹班之契時以戶部侍郎督學三吳薦君詞賦蒙

恩

召試行在卽授中書舍人十八年在軍機處行走喉舌要津鈞衡重地幹略之士是所爭趨君處之以樸誠將之以悃愾

允洽物情莫能疑忘

駕幸熱河木蘭

東陵南苑累扈

清蹕勤慎著稱尋除宗人府主事以祖

母喪去官服滿赴京師屬 王師新平準夷有

詔撰集

方略大學士諸城劉公統勲以軍機處舊人屬以編纂君恪
慎載筆听夕不怠自非職事未嘗私謁二十七年復補原官

遇

覃恩誥授奉直大夫宗人府主事加一級君素懷磊

落落拙於治生宦遊減產有北門終窶之歎塵常生甑口不名
錢竟以憂傷損和成疾以二十八年三月五日卒官春秋五
十有八嗚呼哀哉君本以母老將辭歸養征期已戒大命俄
迫遺令二子秘已喪問勿使太夫人知之嗚呼悲矣時湖南
按察使同邑嚴公有禧在京實經紀君喪醫藥殯殮泊乎反
葬多出其力君凡再娶元配錢氏佐君食貧辛勤黽勉娶三

卷五五

墓誌

六

歲而卒

贈宜人繼配嚴氏卽按察公之姑太僕少卿虞惇

季女 封宜人生三子二女長子資祖父子復祖太學生幼

子培祖生十年隨喪南還將至道天卽以其年十二月十二

日其孤以君之喪與錢宜人合祔宅東先塋之次乞余誌其

幽宮嗟夫余與君交歲踰二紀遷舉比牒之舊秦晉牽連之

戚性情疎放之同文章旨趣之合風期篤密有踰等倫出處

後先互成睽阻豈料奄值殲良長乖執手秣陵之書無因遠

答山陽之夢空期動輪潛然攬筆敢辭蕪淺乃爲銘曰

鹿阿濱海孫宗居再世蘊文君擴諸名甄甲科踐天衢不樂

銅墨歸著書疏明彖繫闢榛蕪得三聖意遺羣儒

乘輿

南巡蒐瑾瑜鳳池鸞閣彰華裾逝將養母還故廬沉瘵忽侵

悲隙駒平生口吃勇有餘行不詭隨言不諛根本肫固節目

疎交賢友直滿八區要津高門絕趨起任實去浮君子徒我誌其涎涕漣如嗟哉斯人今則無刻詞紀實闕泉塗茫茫千年名不渝

陳少章先生墓誌銘

王峻

吾吳昔多博聞好古砥節勵行之碩儒本朝百年來位不大而名最著者則有義門何先生何先生及門無慮數百人其最相契如晦翁之於蔡季通呼爲老友者是爲少章陳先生何先生歿後先生獨以名德見推爲中吳文獻之重輕者幾二十年乾隆十二年十月十三日以疾卒於家典型凋謝遠近爲之嗟歎卜葬有日故人門弟子咸謂先生有道而文宜按古私諡之義諡曰文道先生其孤具狀徵銘於余按狀先生諱景雲少章其字先世家常熟代有聞人所謂河東陳

卷五十五

墓誌

七

氏也自曾大父天麟始遷郡城大父明義喜藏書深禪理多與明季遺民故老游父治昌慷慨尙義拯人之急母朱氏孺人先生生而穎異初就塾時同塾諸兒所課皆能背誦年十七睢州湯文正公撫吳試士拔置第一十九從義門先生游益講求通儒之學窮究經史晝夜無間學遂大殖父喪服闋補吳江縣學生康熙癸酉試京兆不售而歸再至京館藩邸三年復辭歸時年甫四十以母老遂絕意宦遊後藩邸再遣使敦促漕帥赫公命淮安守造廬延請皆堅謝不赴此先生出處不苟之大略也其爲學如飢渴之於飲食終日丹鉛不離手凡經史四部書從源及委貫串井然地理制度考據尤詳下及稗官說家無不綜覽而尤深於史學早歲温公通鑑略能成誦前明三百年事談之更僕不倦若身列其間能剖

決其豪世得失爲文章簡嚴有法所著有讀書紀聞十二卷綱目辨誤四卷兩漢訂誤五卷國志校誤三卷韓文校誤三卷柳文校誤三卷文選校正三卷通鑑胡注正誤二卷紀元考略二卷文集四卷皆能有功前哲嘉惠後來其他少時帖括之文及應聘所修通志等書非先生所留意故不復紀也性孝友居父母憂每動輒絕歲時祭享必涕泗沾衣與人交有始終外和內剛不因人熱所居老屋數楹朝蠶暮鹽人不能堪處之怡然晚歲名益高迹益晦終年杜門足不踏塵市蓋先生視世絕少可語世亦鮮知之者所謂不食之碩果讀書之種子豈與世之工鞿悅營華臚者爭一時之得失哉享年七十有八配吳孺人先卒子男二昇長洲縣學生黃中吳縣學生入國子監女一歸國子生張爾樸孫男四慶曾文雍

卷五十五

墓誌

六

文寬慶餘以是年十二月某日葬於吳山北麓之新阡奉吳孺人耐黃中爲人耿介博學有文爲先生克家子以余不能取容當世顧獨重焉余雖不獲親炙先生然與其子交深且久遂不敢以不文辭銘曰
惟道與文立德立言於時不偶於古獨肩彼富貴者磨滅忽焉先生有書後世永傳吳山之麓鬱鬱新阡我銘幽宮徵在萬年

惠定宇先生墓誌銘

陳黃中

本朝吳中氏族以經義名家世取科第者無慮十數家其繼世科之後獨抱遺經遠承絕學則有吾友松崖惠君蓋其學醇行粹所傳者遠所積者厚其實大聲宏非苟也君諱棟字定宇松崖其自號也先世扶風人後從建炎南渡居湖州明

嘉靖中又遷於吳曾祖有聲始以經學教授與同里徐枋以節義相尚祖周惕父士奇仍世入詞館有大名世所謂老少紅豆先生者也君世家學弱冠補弟子員卽遍通諸經於漢唐說經諸家熟洽貫串而易學尤邃所著周易述一書專宗漢說歷三十年四五易稿猶未卒業其專心孤詣類如此少紅豆前以修城毀家君遷居城南閉門讀易聲徹戶外其世交多躋膺仕義不一通書問惟以授徒自給而已兩淮盧運使館之官舍居三年後以疾辭歸丁丑除夕病中以書抵余拳拳論學術人才之升降其識趣高邁又雅不欲僅以經師自命也夏侯勝有云經術明取青紫如拾芥今觀於君其於經術明耶否耶乃所遇若是使易其窮經之力習場屋臬腐語數千言固宜早取上第去乃舍彼取此爲舉世不爲之學

卷五十五

墓誌

元

晚歲一應公車徵且以爲幾得售矣又未及抵都輒報罷終身學漢人之學曾不得一遭漢儒之遇而處之固然耿耿自信不爲窮達所移斯可謂篤信善道之君子已然君晚歲遇雖益蹇名益高四方士大夫過吳門者咸以不識君爲恥人亦以小紅豆稱之其所以紹門風者蓋不以爵而以德也君爲人通不隨波介不絕俗爲學廣博無涯濼於經史多所論著有九經古義二十卷周易本義辨證五卷易漢學七卷古文尙書考二卷左傳補注四卷明堂大道錄八卷禘說二卷後漢書補注十五卷續漢制考一卷其他如玉尙書精華錄訓纂汪鈍翁說鈴注乃少時所著也君以乾隆二十三年五月十二日卒年六十二娶張氏有婦行子五人承學承德先卒承附後君半歲卒承緒承萼孫一廷鳳君卒之明年三月

某日其孤將葬君於某所以余知君深涕泣來請銘義不
辭銘曰

羣經賴漢僅得存陋儒訓詁增紛紜經義經術殊途分太清
點綴翳浮雲拾瀋剽竊夫已村談易理障尤蒙昏輔嗣以降
一律論惟小紅豆漢學尊九師廢易唾河汾卓爾大雅信不
羣貫通象數追三墳嶢然不爲俗學醺獨尋墜緒草編溫荆
榛函莽勤芟耘下帷著述輕元纒江公狗曲徒犴犴遺書傳
後名彌芬有求芳躅視斯文

卷五十五

墓誌

字

